

84(2Рос-Нен)

кр. Л-24

Леонид Лапцуй

ЕДЭЙКО





Леонид Лапцуй

ЕДЭЙКО

ПОЭМА

2 – е издание

Тюменский дом печати
2006

УДК 894-1
ББК 84(2Рос=Нен)6-51
Л24

Леонид Лапцуй

Л24 Едэйко. Поэма. — 2-е изд. — Тюмень: Тюменский дом печати, 2006.
— 80 с.

ISBN 978-5-87591-101-9

Автор книги — ненецкий поэт Леонид Лапцуй, перу которого принадлежит более 20 книг, написанных для детей и взрослых.

Маленькие читатели уже знакомы с поэмой «Едэйко» — она издавалась в переводе на русский язык в Москве и Свердловске. Настоящее издание — первое на ненецком.

Поэма во многом автобиографична. Она о радостях и трудностях, о крепкой дружбе и любви юных северян к своему суровому и прекрасному краю, об их счастливой судьбе.

Книга адресована младшим школьникам.

УДК 894-1
ББК 84(2Рос=Нен)6-51

ISBN 978-5-87591-101-9

© Л. В. Лапцуй, 2006
© Средне-Уральское книжное
издательство, 1980
© ОАО «Тюменский дом печати», 2006

Вы' яхананда
(нюртей пеляда)

Нерденя" вада"

Яни һацекеы",
Инзелехэрһада".
Нумда пэвсюмб"
Хад' тотрев',
Мерця' тотрев'
Һэдаларингув"...
Тюр' е"эйһэ
Паднабцькоми
Хар"н ня"амангудм',
Мань мэтаһадм'.
Һэвакони нимня
Мюсенако тир",
Париденя тир"
Яв' пармараха".
Вы' яни хойм'
Мань нёдаһадм'.
Нув' хаерако
Һарк" тире" тяха'
Тёня' нюдрев',
Һацекездрев'
Лынзекодараха.
Мань тарем' мадм':
- Нув', хаерако,
Ян, хаерако,
Нултахаркарт!

Инзелехэркар"!
Һаре" тедамбой'
Сехэрэни мюй
Ялэмдахаркарт,
Һадимдехэркарт.
Хар"н яни илм',
Совета"на" илм'
Падыбаб"нани
Яля һэриһая.
Ялэмдад нумгэ
Һэвакони ниня
Хо ебц' мюня
Таня пыһгэрһая.
Һэрм яни харп",
Яленана" харп"
Мань һэвакоми
Ялэмдамбаһамдо".
Сибимдембаһамдо".
Яни мерцяһав
Хылвананараха,
Хамб" тотрев'
Харта һэсеты.
Лахарёхонани
Си"ми нядасеты.
Тюку падавэми
Яни һацекеы"
Толабариһамдо',
Пили" ваде"һамдо'.

Тикым' толаба
 Парондэй" нимня
 Тая санарҗая",
 Пили" ядаҗая".
 Падвэхэнани
 Яни җацекеы"
 Җэдалёб"нандо'
 Нув' мерцяхава
 Пундо' хаюрҗая.
 Тайнана" сеҗга"
 Ё" сэрерка"на,
 Нуво" пудаха"на,
 Яво" сёрха"на
 Тэднанараха".
 Яни ненэця"
 Нюдя җэбыхындо'
 Нисянато' илм'
 Харто' нёдасеты".
 Хусувэй сарпям'
 Җудонданаҗэ
 Пыдо' мэцеты".
 Яни җацекеы",
 Мань җэдалыдм',
 Хар"ни хыно"җадм'.
 Теда' е"эмнянда"
 Паднариҗадм'.
 Падвэхэнани
 Писавэй яля'
 Пядавэдрев',

Сехэрэдрев'
 Яля" хаюрта".
 Җэрм яни ялэ:
 Җэрё' яляхаби,
 Вы' яни сырам',
 Нув' нарахавам',
 Та' җэсоҗгавам' -
 Тэвадариҗгун,
 Выдамбариҗгун.

Җэрм яханани
 Теда' сояриҗа
 Җоб" җацекеы,
 Едэйкориҗэ
 Пили" нюмдеҗава".
 Хуна сяхаринда
 Маня" сэвдана",
 Җудонданадана"
 Тараҗгодакы?
 Едэйкони ня'
 Мани' сидяҗэ
 Җоб" то"олсани' -
 Хар"ни' иле"мини'
 Ненэсявнанда
 Лаханакоҗэ
 Хар"ни' мэтаяни'.
 Мани' падаҗгуни',
 Вэтарпариҗгуни'.

Џэрёй

Џэрёй нумгана

Пи' тидхана -
Пэвдейхана
Вэңгалана нуда
Тамна ни нэдо".
Ялэмдад' нэва
Нув' тецьдако'
Мурюмдамбадан'
Џули" нярмавы".
Яля - хаерако
Хаерад' ин
Вы' хоё" нимня
Ядцие"лавэ.
Вы' яни хоё
Хубтыхы синё
Пили" тондабида.
Џарка вы' ява"
Џэрё' ёльцяңгана
Хуниндакораха.
Вы' ханебцёко
Юмб' нэва' нимня
Лямбабтырңанё".
Вы' хоркыця"
Сыра' сэвдарем',
Тар' пусадарем'
Пуларёдараха".
Вы' хоё" нимна

Саңом' нэдараб" -
Сысумбариб",
Вы' яна" тер" -
Ты пэртина"
Пыдо' ёндриңа",
Ямб мюд" пумна
Толырцяда тыдо"
Харто' сяйна",
Неро' тидраха".
Нямдо' таркахава"
Хо' таркараха",
Ханимы ямдо'
Тобарихи"нато'
Пиндамбаңадо'.
Ты" понливана,
Янамбокована
Маня" Едэйкова"
Ти нэдалёда.
Пыда мэта тыда
Харта етя нэда".
Едэйкова" нява"
Сян понда нэвам',
Сян понда томам'
Џуда' таркаха"на
Манэ"лабтаңгуда,
Мандараха нэңгу:
- Харта" толаяда"! -
Си"ив похонанда

Тыда хареба
 Ёобо" төресеты":
 - Хэй! Кэй! Хэй! Кэй! -
 Пили" төренаңгу:
 - Хэй! Хэй!Хэй! - .
 Пыда танырцянда
 Хэврихинанда
 Тэвам' партэ"ламби,
 Ёобо" төресеты".
 Харта ервханда
 Мандараха нэңгу:
 - Ты танаба
 Сит нядабидм'.
 Варандако тым'
 Нидм' нэдараңгу"...
 Маня" Едэйкова"
 Харта вы' ямда
 Теневариңада.
 Ёарка Яротомда
 Юрибенда ня'
 Хориңгухуюда.
 Маня" Едэйкова"
 Синё яляхана
 Ёарка Яротонда
 Юрибенда ня'
 Сидя поңгананди'
 Пыда соявы.
 Ненадовнанда
 Соя"мамда ямда
 Ехэрариңада...
 Харта соя"манда
 Сарпяконда мюйм',
 Харта мята нэ"мам'
 Небяехэртада
 Ехэрариңада.
 Мюсе"мядо' ядо' -
 Ёарка недарме"э -
 Хоё' сехэры

Яха" сояравэ".
 Едэйконд небя
 Нюмда халта"мам'
 Сыра' и"лихина,
 Тюнцянлихина,
 Тодабцялихина
 Нюмда тодала"мам'
 Пыда тенеңада.
 Сёйрадотана
 Ебцконда мю'
 Сыхыдамбабата
 Нув' тецьдако
 Нянзыбюрңадась,
 Манда' то"олхась:
 - Нён хаңгурцету"! -
 Маня" Едэйкова"
 Ялэмдатрев'
 Тарпотанадарем'
 Нярмортариңась...
 Ялэмдад' нер',
 Ёарка нумгэ' нер'
 Пыда төресеты",
 Харта ярумсеты...
 Мюсеварихина
 Небя' хан' мюня
 Пыда ебцкода
 Парондэй" сер',
 Ёэдалёва" сер'
 Хан' манзахана
 Пыңгэртадрев'
 Манзабтёрисеты.
 Ёэрм яна" мерця
 Хадм' манзабтаб",
 Тире" мюсилеб"
 Едэйкона" сядм'
 Пыда манэ"манзь
 Ёобо" вэрцамзеты".
 Маня" Едэйкова"

Мерця сидеґада,
 Ңуди вэнпюрґа.
 Сёйрад' иням',
 Тайнана сеґгам'
 Манэ"манда сер',
 Ня"маванда сер'
 Ванебтерисеты".
 Тайнана" сеґга",
 Харто' сёвнандо'
 Пыдо' хыноцеты".
 Маня" Едэйкова"
 Сензи тэлтамби,
 Мандараха җэґу':
 - Нумгэ" понлихина,
 Тире" тяхарина
 Ңани вы' хой",
 Малсяда" хой"
 Нивням' таня"?
 Хоё" понлихина
 Ты" хадыртакэ"?
 Ңани ненэця"
 Ңэдалёртакты"? -
 Маня" Едэйкова"
 Тарцям' мание
 Тэри ханьре:
 - Хо ебцкоми,
 Сёйратнами
 Мер' хаеґув,
 Лэ"моракодарем'
 Хар"ни тириґув"...
 Маня" Едэйкова"
 По мада"мида
 Нида хамэдамбю",
 Пили" юрыбида.
 Ңани' җэрёґэ
 Теда' хэривы.
 Ңока"я ты"
 Няда соядадо'

Няротялаядо'.
 Маня" Едэйкова"
 Тыда сюртемби,
 Лахацие" нимня
 Ңэдалёб"нанда
 Хан яльцядарґа.
 Хусувэй тэда
 Харта нюмзавэй,
 Турорим"нато'
 Хамэдамбаяда.
 Лэтамбада тыда
 Харто' нюм"нато'
 Пыда пэръяда.
 Харто' тосеты",
 Сита тюнесеты".
 Вэнолаб"нандо'
 Тыта хаду" тяха'
 Пыда сюрбасеты",
 Няби җудахана
 Ңоб' пендертамда
 Ня"амбасетыда,
 Хой' сармикамда
 Неру" хэґго"мана
 Тэводасетыда.
 Пэвдяхихина
 Ялкадарта сэв,
 Сидя морё сэв
 Пензя' ваґгарин',
 Сэхэ' ваґгарин'
 Хунамбадаханда
 Нида җэдараґу"...
 Пыда пендсимда
 Ңобо" җэдабата
 Ңэдарада яґу.
 Нися - вэсакода
 Ванебтесёты,
 Пыда манзеты:
 - Мань, Едэйков,

Ҳарамҗагаявэн,
Енелиб"нанд
Си"ми пыдавэн,
Нена пэдаван.

Ханебцё' пумна

Ҳэрёй нувода
Пилибт" пяйда.
Ялэда хэбима",
Пилибт" тидерҗа".
Ҳэрёй яяна"
Тарэнзянда ний
Ту' сибяраха,
Вы' яна" ний
Сермасялмы.
Маня" Едэйкова"
Нисяконда ня'
Ханебцёку" пумна
Пыди' җэдалыхы'.
Ҳарка вы' ямди'
Саҗо' малпиди'.
Юмб' җэва' ниня
Ханебцёко" җамды".
Пись" сарпъ" хари
Нёракулвы".
Тикы сарпъ" мю'
Еся яҗгоциди'
Нохо' яҗгоҗэ'
Пыди' мярыбиди',
Ҳэрм' ханебцёко"
Сехэрэнди' мюйм',
Минзь янди' мюйм',
Манэ"лабтамбидо'.
Ҳэрм' ханебцёко"
Пись нюраку"җа",

Хой' тэва ёря"
Пись ня"марпюрҗа".
Хуна сяхаринда
Вы' яна" хибя"
Ҳэрм' ханебцёку
Ханеваханандо'
Харто' пуно"ядо'.
Маня" Едэйкона"
Нид җэдалё
Няби хада яры
Носи" тёр" ня',
Нябида сэвда
Нумна сырҗа,
Нябида сэвда
Явна сырҗа.
Хой' тэва ёря"
Хой' тяхарина
Ваҗготаридамдо'
Сабкабадакы"? -
Ида ядэлиҗа
Маня" Едэйкона"
Тарем' ядэлиҗа.
Носи" җудо' мю'
Яҗгу мярыба
Теда' тоходаҗа,
Пыда тоходаҗа.

То' сэркана

Тандаяри" ханимы
Ҳэрёй то' сэрокоця,
Ҳарка то' сэрокоця
Яля' тэри ябире".
Ҳарка то' сер' ниня
Ҳэсы' тер" җацеки"
Пыдо' ти сянакурҗа" -





Таб"цяда муро" ниня
 Пененана сэр' нимна
 Тэри ти пулаңга".
 Маня" Едэйкова"
 Тикы то' сэр' ня'
 Пыда ңод" сюрамбинё".
 Салтад' ни',
 То' сэр' ни'
 Хар' малхана
 Янда падраком',
 Сава падраком'
 Пыда сертабида.
 Ңарка вы' ямда
 Падтамбаңада.
 Еси" харасавэ',
 Хоё" сюмбасавэ',
 Ханенасавэй',
 Нув' тирсавэ',
 Мюсенасавэй',
 Ёртысавэй',
 Тиртя ңаносавэ'
 Мал' сертаяда.
 Маня" Едэйкона"
 Ңацекеы" нида
 Пыда хэвханда
 Ти мандалуңгана".
 Харто' ямдо'
 Хамэдариңадо'.
 Хусувэй хойм',
 Мараңгасавэй',
 Юмборацавэй'
 ңадасавэ вындо'
 Пыдо' тумдаңадо'.
 Ңэсы' ңацекеы"
 Нидо' нертемби",
 Тарем' лаханаңа":
 - Хуна мальуңгана
 Хар"на" вы' ява"

Паднабцяңгана
 Хар"на" сертаңгува",
 Пили" падаңгува",
 Халмадамбаңгува".

Мутра

Теда' тюку ңэрё'
 Ты пэртя" нина"
 «Спидолам'» тэмдаңаць.
 Москва' хэтыбада
 Вади пыдо' намдорңаць.
 Тикы ңарка мутрадо'
 Ңули" и' хэбиле"ма.
 Теда' тюку яляхана
 Ңэсы' тер" ненэця"
 Саяуңгардандо' ня'
 Пыдо' мунзи" инзеле".
 Маня" Вавлёна"
 Ңавхы иле"мамда
 Сюдабабцахана
 Пили" ваде"ңадо':
 - Тире" поё"мана
 Ханавэцяңэ
 Пыда тиливы,
 Хурка мирбяха"
 Харта ха"мормы.
 Тэта ненэцие"
 Сава илевамдо'
 Сэхэдаривы,
 Нидо' хабей"мамдо'
 Волтамбавы.
 Мауґабада нида
 Ма"ларивы,
 Пунда вэтавы.



Сава иландамдо'
Пыда сертаван',
Табэдариван'
Ѓули" харвавы...
Неняґгана" пуна,
Енядата пуна
Маня" яна" ни',
Хар"на" яна" ни'
Маґгабади" илм'
Ѓули" сава илм'
Ѓабтариґась,
Мэюмдариґась.
Маня" Вавлёва"
Мэта мантанда
Тода то"олхась.
Ленин нява"
Тире" пан"мана,
Нуво" пуд"мана
Тиртя' тотрев',
Тотанадрев'
Ѓарка вы' ява"
Саґорихинанда
Мал" пюрґадась,
Я' ваґгасавэ'
Ханза"лиґадась.
Яна" ґацекеы
Тохолкова' ня'

Тидахалембись,
Табэдамбидась.
Маня" Едэйкова"
Ѓарка мутрамда -
Харта лахананам',
Муно ха"моланам'
Няби ґудахана
Харта ня"марпида,
Пыда ти хорпида,
Манда' то"олханё":
- Лаханана нява"
Машинанда мюня
Нибтав' ґамдю"? -
Ѓэсы' ґацекеы"
Няндод' хэвхана
Хаво яро"ла",
Сэвридо' мэґа",
Мунзи" инзеле",
Вавлё Неняґгм'
Ирим' пыдаван'
Харванадо' ґока,
Тарэнзяхабидо'
Мэюмламбаядо'.
Ирим' пыдаван'
Пили" харвариґа",
Мер' вадёван'
Харто' харвариґа".

Сырэй

Поңэй мерця' хад

Нарка пэвдей'
Яляконда ямб
Ноб" ту' ту"ма"
Пилибтари' ямб.
Яни", жацеки",
Инзелехэрҗада"
Мань мыникодм',
Хар"н хыно"җадм',
Нюрцьбендаҗадм'
Иликатаҗадм'.
Пэвсюмя няңы
Ялэмдад' харп
Тодабцяндарев'
Тэри хаҗанаҗа.
Ти сырҗада" -
Парисе"э тир"
Ята"мадарев'
Тир" париде",
Ялэмдад' нэвам'
Юталпадараха".
Хоё" ядхава"
Тидҗэ хая".
Ноб" нэдалёда'
Халарида миҗа,
Пэвсюмя' няңы

Харп' ялэмдадм'
Нертеварин'
Пыда харванакэ,
Нена" харванакэ?
Маня" Едэйкова",
Нисяконда ня'
Пыди' нэри́вэхэ'...
Нув' хадхава -
Ханени"на" мая':
Хой' ядхана
Хад' лаҗгахал",
Тире" лаҗгахал"
Тёня' тэвадарем'
Сакадартараха",
Нув' мерцяхов
Ты" нерцюна
Сидя нэнда ни'
Нулаҗганараха.
Нув' хадхав'.
Тецьдарка хад
Ты" пыи" си
Сабыбадараха.
Мэта хан"коди'
Хад' тахамана
Парондэй" тяха'
Сакадалавы".
Неро' тидраха
Сидя" нирцьед и'

Салабаринэ
 Сендевыда"нё".
 Хад' тахамана
 Нув' няран'
 Саңу нэдпихи',
 Нумгы няд"мяць
 Мяти пюлиңаха'.
 Хоркыдрев',
 Мяцьдадрев'
 Сыра' ваңгахана
 Нихи' маяндорт".
 Тыди' нэкалпидо'
 Мяд' һабт' ня'.
 Һаво" пиркана
 Парондэй' ни'
 Тапахалтадрев',
 Тинданадрев'
 Вадо' ёркарин'
 Мэта ханкомди',
 Ханон" маларин'
 Нултариңади'.

Тодабць'

Маня" ханенина"
 Пэвдяхихина
 Һэдалёб"нандо'
 Ту' ялякон',
 Мяд' һабтакон'
 Һэдалёсеты".
 Ту лэирпата,
 Хаңанаб"нанда
 Пюңг" сёвнандо'
 Пили" хаңарцеты",
 Харто' хыноцеты".

Мань ирикэми
 Тарем' манзеты:
 - Ту' ныхыхыва
 Сяхаринда са"ңа,
 Хоё маторпа,
 Иде маторпа
 Һани' пир"ңада.
 Хаңанаб"нанда
 Нув' няраком',
 Нув' тирхавам'
 Пыда нянзаңгуда.
 Ненэця' нюм'
 Һани' юдаңгуда.
 Нюдя нэвакон
 Мань мальңгана
 Туни явокон'
 Няк' немахана
 Хонарасетыв".
 Нема' юдэхэна
 Ту' лэёкоци
 Маниеб"нан
 Тёня' тэвадарем'
 Сакадарцеты",
 Ту' татохова"
 Нумгы" тотрев'
 Маиртадрев'
 Си"ми синдасеты".
 Нема' юдэхэна
 Хо тюркоми
 Иларисетыв,
 Нямарисетыв.
 Хар"н тёрхани,
 Хар"н писяңгани
 Ту' хэвхана
 Сидёрисетыдм',
 Юркарисетыв"...
 Маня" Едэйкова"
 Сыра' ёльцьңгана



Тунда пярїңэ
 Пюнзи сирыба
 Сыра' ңыларимна
 Сабканорцеты.
 Нюдя пюңгахаби
 Ту' пярїңэ
 Нида маторпюр",
 Вадёвандо' сер'
 Ту' пярїңэ
 Пыда мадаңгуда.
 Пэвсюмбэхэна
 Ту' хэвхана
 Ңамдёдарихинда,
 Пэда"махаданда
 Ңэмунзикода
 Сита талесеты.
 Нема' юдэхэна
 Хаңанана пита
 Сёхо" инзелеңгу.

Пэвдей' пи

Пур" тецьдако
 Синём' нядмяць
 Нув' вархавам'
 Я' сяр' ни'
 Тадтамбаңада.
 Пи' пэвдяко'
 Вы' хоё" нимня
 Тидрида миңа.
 Ялэмдад' ңэва
 Тире" тяхаримна
 Ёхобортараха.
 Иры' яляхава
 Тире" поё"мана

Лынзекодараха,
 Толасяда нумгэ
 Толабадараха.
 Ңэрм яна" ирэ
 Тире тюркуць
 Юрко"танараха,
 Вы' яна" сёнзям'
 Ялэмдамбаван'
 Пыда харванакэ?
 Яни ңацекеы"
 Иры' яляхана
 Тыдо' ерамбюрҗа".
 Вынд сармикэця
 Иры' яляхана
 Тэн' ни" пэңгу".
 Яни ңацекеы"
 Пыдо' инзелерҗа" -
 Нув' тецьдако
 Сыра' сяр' нимна
 Се"нарида миңа...
 Маня" Едэйкова"
 Иры' яляхана
 Ты сюртемби.
 Ңэрм' янда харп"
 Ңэваконда нимня
 Ңоксяндрев'
 Лабананараха".
 Ңацекеы нита
 Хаця" пинбато'
 Маня" Едэйкова"
 Пыда манзеты:
 - Ңарка хасавада",
 Ңамгэм' пилу"җада"?
 Ты" хадорихи",
 Ңарка хадо' понд'
 Нита хонараб"
 Сёмда ханасеты.

Едэйконд сё
 Пи' ямбахана
 Яха' ендтарем'
 Ёоб' хайнаңгу.
 Ёын' ендарем'
 Выбелаб"нанда
 Сян янда мунм'
 Пили" толасеты.
 Ёэва' инядарем'
 Сёда выварцеты.
 Ёацекеы" нида
 Сидёвандо' сер',
 Санавандо' сер'
 Сёдо' ханасеты".
 Хурка пыдо' ёод"
 Хыно"маханандо'
 Нув' сармикэци"
 Муно толасеты",
 Лохорти" мумна
 Сёдо' сю"ларцеты".
 Ёэрм' яндо' нумгэ"
 Пи' ямбахана
 Ялэмдамбаядо'.
 Ёока"я" тыдо',
 Хадырмандо' сер',
 Ванормандо' сер'
 Харто' туросумби".

Сэдорана' хэвхана

Маня" Едэйкова"
 Маманда хэвхана
 Пулыбтё һамдёри.
 Небяюм' манзеты:
 - Нув' ядахад

Си"ив Со"ом нумгэ'
 Нув' сава ер',
 Ёэваконд ни'
 Тэвриб"нандо'
 Ёацяр тут"нив',
 Ханесэйм' тат"нив'.
 Иры' яляхана
 Ёэрм' нумгэхэва
 Сехэрэнда мюйм',
 Сыра' сяр' нийм'
 Ялэмдамбаңгуда.
 Мята нида тяхабтаңгу",
 Пыда нида тальтеңгу".
 Маня" Едэйкова"
 Тунда хэврин',
 Тюмюнда варрин'
 Пыда ти собкавы.
 Едэйконд небя
 Ёюнда мальцяд,
 Сава сёвтяд
 Пыда сэдыбинё".
 Тэ нир" хар'
 Сава мадавы
 Пыда паркыбида.
 Харта ихинанда
 Едэй мадавым'
 Тасламбадакэ.
 Пыда янда илм'
 Мадавэрихина
 Манэ"лабтаван',
 Харта ваде"ман'
 Ти харваңада.
 Сэдораб"нанда,
 Инда һыларимна
 Сёмда ханасеты:
 - Мань Едэйкоми
 Муртыци" тивы
 Лэ"мор' нюрха,

Хоркы' нюрха:
 - Хов-хов-хов - тутнов!
 Хов-хов-хов - тутнов!
 Нисярэй тутнов!
 Пыдарэй тутнов!
 Ханандов хурёсей,
 Нинхата панацей. -
 Маня" Едэйкова"
 Нема' тахамана
 Харта небяханда
 Пыда инзелерча,
 Харта ванебтюрча.

Мирць тенева

Маня" вы' ява"
 Яна" ненэцие
 Нэдалёрмахана
 Тохоламбаяда.
 Яна" жацекы"
 Ихибцялихина,
 Тубка' сябарпа,
 Мел"мана ясьпа
 Паромдэй сехэхэт,
 Манэмбэй сырахат
 Ханосертасеты",
 Ты сябарцеты",
 Мядо' мярсеты".
 Ты пэртидо'
 Вэнекосавэй',
 Жацекэсавэй'
 Тэхэ" ядсеты".
 Маня" Едэйкова"

Нарка вы' ямда
 Ненэцянзавэй',
 Ханедасавэй'
 Пыда сертаңада.
 Хурка манзаямда
 Сертабаб"нанда,
 Минреб"нанда
 Ни выдараңгу",
 Пыда сертавэмда
 Сэв" хамзаңгудо'.

Тэхэна сянаку"

Нарка вы' ява"
 Хар"на" вадё"мава",
 Маня" мэнежава",
 Тэва" харта жока.
 Хар"на" тэхэта"на"
 Маня" ненэцяма".
 Лаханакохо"на,
 Сё"на" хараха"на
 Маня" нарка ява"
 Хуна сяхаринда
 Хынотамбадава".
 Харна" яна" хибя
 Хубта янда пойм'
 Мадабаб"нанда,
 Сехэрэнда мюйм'
 Пыя ням синё'
 Синдабаб"нанда
 Тэда нида ёт",
 Харта нида ёт".
 Теда' тю"у' миндя", -
 Инзелехэрчада" -
 Нерня мэтамд,



Пыдар харт тэмд
Хо тюрхана
Нёр яебтамбю",
Нартиңы иня'
Нёр лабидембю",
Ядриб"нанда
Пыя' малхана
Сехэрэнда мюйм',
Нэл' сырахавам'
Сирыбаб"нанда
Имдя ибе"ңая.
Хо' таркараха
Сидя ңарка нямдм',
Сидя таркаляңгм'
Хой' сюмбарахам'
Махаконда ни'
Моёпюлаңгуда.
Тарем' миндыханда
Харта мята нимня
Нямдорэдаңгуда.
Яна" ңацекеы"
Ебцкондо' мюд
Сана"махадандо',
Тынзям' санопа
Тэхэ" ядриңгу",
Ти ңадьбято'
Ян ңацекеы"

Тэңэ сянаковам',
Ты' сянакубцам'
Харто' мэнеңадо'.
Маня" Едэйкова"
Сита ңар нида
Пыда сянако
Пили" няцеты.
Ты" нямдо' мэта
Нида яркыба
Пыда худворңа.
Нида яркаванзь
Няби пенда ни'
Тынзяконда мярам'
Моёпюларингу.
Вэдандарка тым'
Яркыбададарем'
Пыда хо"лерты". -
Нида сюрбаяд",
Ты" тотрев'
Нявоталаяд",
Пыдо' туросумби".
Мал' ңобо"лад
Тодо' мовахана
Нида яркыбида.
Тынзя' мяра' мюня
Сэв" ялкадарңа".

НАРА

Нара' нерденя яля"

Теда' сырҗада"
Хоё" маси" нимня
Нув' варарин'
Хубтыхи тир",
Ялэмдад' нэвам'
Нярмолабтамбидо'.
Вы' яна" латадан'
Тамна тецярка,
Танзярарка хадм'
Мерця танабида.
Теда' җадимдана
Ялэмда"на" нэва
Нумда няран'
Табцотанараха.
Җарка яля' сэв
Тире" поё"мана,
Вы' хоё" нимна
Тан"танараха.
Нув' тирхава"
Яля' сэв' ед',
Ябтабэдарев'
Хой' маха' нид
Тиңготанараха".
Ё" тидхава"
Яля' сэвхад

Я' ваңгарихи",
Хоё" маси" тяха'
Лынзекодараха".
Ясосе тире,
Парисехэби
Хаерад' сэв
Лыңгарё"макомда,
Такала"макомда
Ёльце"махаданда
Тире" нэв" нимна
Есьретанако'
Пыда то"олхако.
Җарка вы' ява"
Хонё"махаданда
Юркотанараха.
Харта пыхыдамда
Высылпадараха,
Вэн"падараха.
Маня" яна" тер"
Хаця" хасабарць
Лахананараха":
- Пон' җатеҗава",
Сит җатеҗава".
Нара, торивэн,
Мара" тэввэн...
Маня" Едэйкова"
Сёбям' екавы,
Хаерад' ня'

Нарка хой' ни'
 Вэнеконда ня'
 Пыди' сюраибихи'.
 Нарка нэсы' тэхэ"
 Нобо" төресеты"»:
 - Хэй-хэй! Хэй-хэй! -
 Пова" ваераңа, -
 Хэй-хэй! Хэй-хэй! -
 Нэрм' яна" нара
 Теда' ти миндя -
 Пыда төрханда
 Пензь" ваңгахат,
 Еси" харахат
 Еси" таркадарем',
 Мюд" тотрев',
 Лохортадрев'
 Ты" вэрнаңа",
 Нув' мин' ед',
 Хаерад' ед'
 Пыи нодо"ла".
 Ноб" сарпя' мю',
 Пыдо' вэтанга",
 Нарка недармем'
 Тоб" сирыбидо'.

Варё" надимы"

Саля' пыя' ни'
 Варё" надимдаңа".
 Сыра' техэ нув" -
 Тырабэй нув",
 Ненэцяндарев'
 Хаерад' ня'
 Нэв илыбюрңа".
 Ты' нядахава"

Тэри саренаңа".
 Варандако ты"
 Нара сырахавам',
 Тоянана сырам'
 Тоб" пин" пидо'.
 Ханумы табо
 Нянзыбариядо'.
 Маня" Едэйкова"
 Варандако тыда
 Ма"ламбаяда,
 Яндо' сябарпида,
 Тыда сюртемби.
 Сыра' ваңгарихи",
 Парондэй" ни'
 Пыда монасеты".
 Нани' юркасеты".
 Варю" нэв" нимня
 Пыда ядсеты.
 Ядаванда сер'
 Сыра' ныларимна
 Лохортако ик"
 Пыда инзелерңа.
 Маня" Едэйкова"

Су"ляко

Теда' тюку яля',
 Хубтарихина
 Нарам' минрена,
 Нюртей суюм',
 Нюдякоця тым'
 Пыда манэ"ңада.
 Сую юркута
 Пындаёркава
 Тет нэнда ни'.

Харта небякода
 Тамна нянзыбида.
 Хаця" турсумби,
 Ёэл" сырахавам',
 Ёмзя сырахавам'
 Нянзыбюлавы,
 Пыям' нодо"лаңа,
 Пыда нямяван',
 Харта наворман'
 Ида харванакэ.
 Юркаванда сер',
 Я"алманда сер'
 Хаця" ядаңганзо'
 Сую хэсеты.
 Ёэкацяхабида
 Пюңг' таркадарем'
 Выяңганараха".
 Юдмян еңгам'
 Мэсо"махаданда
 Нир тэвриңгу",
 Варю" нэв" нимна
 Тоба" мярёдаңа",
 Сую пулариңгу",
 Тар' пусараха
 Харта нэсеты.
 Маня" Едэйкова"
 Яля' ямбахана
 Ёэм' танриңа,
 Ёамгэ пэдасяда
 Пыда нэдакы?
 Сую' няримна
 Ваде"манда вада,
 Вада харта нюка, -
 Ёамгэ хасалцяда"?
 Нита поё"мана
 Пыда ядэсумби,
 Манзь пэрңада:
 - Нарам' минренам',

Нерденя суюм'
 Мань манэ"ңав,
 Мэта мантани
 Хар"н тумдаңав,
 Мань нюмдеңав.

Пирдырңа"

Теда' тюку яля',
 Маня" Едэйкова"
 Харта нита ня'
 Нертеңгуртаңа".
 Ёоб" ирсуку'
 Хан" нульяда"нё".
 Тикари ныңгана
 Ёэдалэйда"нё"
 Нара сыра' нимна
 Тар' пусадарем'
 Ти пуларёда".
 Нита нерня',
 Сати" нэварин'
 Маня" Едэйкова"
 Пыда муңгабтэй".
 Юди нэта хан',
 Хан' ханзад'
 Сыра' сяр' нимна
 Харто' сёвнандо'
 Хыно"лаванондо'.
 Есь няр"мата
 Хан' ханзад"
 Парондэй" тяха'
 Хан' ханзад"
 Яльцядарманондо'.
 Хой' сямб' нимня

Нэрм' сябармы
 Парондэй" нимня
 Харто' хынворҗа".
 Пирдырти"на"
 Нэвакуто' нимня
 Нарка сеси" җар"
 Сыри" са"молад"
 Хоркыдрев'
 Тирць хан"мондо'.
 Маня" Едэйкова"
 Мэта хан' ниня
 Ноб" ни' җадо",
 Лахацияндарев',
 Тыра' мандалтарем'
 Пыда мандалмы".
 Ябта сюдавана
 Ноб' тэдамзеты" -
 Тыда манзабтамби,
 Тыда' харебида.
 Тад җани нида
 Пунда вэтаяда.
 Ты пэртина"
 Маня" Едэйкова"
 Саць саву"җадо'.
 Едэйконд нися
 Саҗорихинанда
 Манда' то"олханё":
 - Хуна сяхаринд,
 Илевахананд
 Нит нэвахана
 Тюку яляхана
 Пыдар тэв"мамд
 Нёр җаркабяс".

Яркола

Нара яляхана
 Нули" саць сава.

Варю" поё"мана
 Сыра" ябире".
 Су"лякоцина"
 Небянато' пумна
 Сянэ"сумбари
 Харто' нявотарҗа".
 Нэсы' җацекеы"
 Харто' тынзяҗодо"
 Пыдо' ня"амавы".
 Нара сыра' нимня
 Сую" няюв,
 Тыто' няюв'
 Ти' ядариҗа".
 Сую нэдарамби"
 Пыдо' помнандо'.
 Сую" мялкадарҗа"
 Тынзя' мяра' мюмня.
 Нена" халцукэй",
 Тяха' халцукэй"
 Сую" нэривы".
 Сидя' мюй' җод"
 Харто' вадёда"җа",
 Сую" сянэ"сумби".
 Харто' пыхыдадо'
 Пыдо' сянако
 Пили" вадабюрҗа".
 Маня" Едэйкова"
 Сэхэ' ваҗгавана
 Вацодорць миҗа
 Тынзям' санопюрҗа,
 Яркыбада суюм',
 Харта тэнда нюм'
 Пыда тэводаҗа.
 Мерця' яраҗганзо',
 Сэхэ' хамы"мана
 Тынзяконда мяра
 Тэри мирнаҗа.
 Париденя сую,

Џоб" нядэ сую
 Сидя париденя
 Сэврида нялја".
 Су"лякоцяда
 Тынзя' малхана,
 Иня' малхана
 Сярдадарев'
 Тидпой' мија.
 Ядаванда сер',
 Ладарманда сер'
 Сую туросумби,
 Харта небякомда
 Ханда нэдакы?

Нарэй пи"

Џэрм' нярина,
 Нара' ёльцягана
 Яля" пито" ня'
 Џоб" то"олсадо'.
 Пи" ямбахана
 Пили" пон' яля.
 Хаерад' сэв -
 Яля' па"мя сэв
 Я' сяр' ни',
 Ид' маха' ни'
 Тюрхалпа"нанда,
 Танхалпа"нанда
 Нув' няран',
 Тю"у' няюв'
 Тан"талсеты".
 Џарка вы' ямда
 Писавэй яля'
 Мал"паб"нанда
 Яна" ненэця"

Та' ёльцягана
 Немам' юрсеты" -
 Итя Џабтеньяндо'
 Варм' тэводаңгу",
 Ханзо яридамдо'
 Пыдо' пюридаңгу".
 Неняңгарихит
 Пыдо' хунамбаңгу".
 Џэрм' сейрин'
 Теда' мюсериңа".
 Ямб мюд" ябцо"
 Хой' маха' тяха'
 Сакадарцеты".
 Маня" Едэйкова"
 Тыда' хареба
 Џобо" төресеты":
 - Хэй-хэй! Хэй-хэй!
 Мер' ядаңада",
 Хэй-кэй! Хэй-кэй!
 Тид" минлиңада",
 Нявотариңада",
 Тэводана ява"
 Џули" тэвхава"!

Юдта"ма' пя

Теда' тюку нара'
 Тына" мал' ни"ңа".
 Тына" понлихина
 Џоб" туроңэ
 Сую" илыбидо'.
 Хусувэй суюм' -
 Хусувэй нядэм'
 Сэвтембаңгува",
 Тид" нюмдеңгува".



Ти, ты пэрман'
 Харвариб"нанд
 Тамна нюдярин
 Теда' тюку яля'.
 Ты" толыркана
 Харт ирикэр
 Сит тохолаңгу.
 Ёарка ирикэнд
 Толаңго мэта
 Юдта"ма пяда
 Пыда таява,
 Харта нихинянда,
 Мэта нихинянда
 Ёоб" ыдёдада.
 Ири' мел"мана
 Харта сертавэда
 Юдта"ма пяда.
 Ты' толыркавам'
 Нида лыдаб"таңгу",
 Тасламбаңада.
 Ёэсы' ңацекеы"
 Харто' ирикэмдо' -
 Ня"амбара ирим,
 Вада ненза ирим'
 Синд' ңамдалҗадо'.
 Пыда нюта сёд -
 Лаханаку' сёд
 Харта мэцеты.
 Нида тяхарина
 Варк' тибяхава"
 Ляңгабтёсеты".
 Ханзер" тэв"мамдо'
 Симдебасеты,
 Ваде"лисеты.
 Маня" Едэйкова"
 Харта ирикэмда
 Пыда пыдаван'

Харта харварись
 Нида тяхарина
 Ёоб" варк' тибям',
 Ёумбъянда ямбам'
 Пыда минарцеты.

Лохортако"

Ти хаерад' иня"
 Пиняминдядарем'
 Нара сырахавам'
 Пили" сипаҗадо'.
 Сыра' парондэй",
 Вы' парондэй"
 Лохортариңэ
 Хэңгадалаяд",
 Сю"лалаванодо',
 Ханьреванодо',
 Ся"лкадарманодо":
 Сехэрэто' ңут
 Яда"мито' мюд
 Ерыбаванодо'.
 Тиртя сармикато'
 Муно толабюрҗа".
 Вы' лохортако"
 Ёоб" сарпя' мю'
 Пыдо' тереңгаңа",
 Ёарка яха' ня'
 Небя - нисяхато'
 Маймбадараха".
 Пили" ха"мыкана
 Лохортако" яха"
 Ёарка ңяндо' минм',
 Яха' ендакавам'
 Минхалембидо' -

Лохортакорихи"
 Пыда инзелеңа:
 Сёндо' хамырмана
 Сёмда ханаңада.
 Сэврида мэ"ңа:
 Яха' ендака"на,
 Хамб" понлихина
 Нядэ су"ляко'
 Ёэварида ңади,
 Пыда небякода
 Яха' варвана
 Нявотартаханда,
 Санартарихинда
 Туросяламы.
 Тарцям' манэ"ли,
 Суюм' тэвода
 Маня" Едэйкова"
 Яха' варвана
 Ти сюрамбада,
 Тынзям' санопюрңа.
 Мерця' яраңганзо'
 Няби марць' нимня
 Ханилебтеңада.
 Су"лякоцямда
 Пыда ёңгоңада,
 Харта тедңада.
 Тет ңэнда ниня
 Су"лякоцяда
 Тэри ледреңа.
 Харта ервханда -
 Сита ңэдавэн'
 Париденя сэв
 Муңголабтамбида,
 Харта ервкомда
 Тумдыбадараха.
 Сэврихи"ната
 Харта ервханда
 Манда' то"олханё":

- Теда' нюдяридам',
 Ёарво"махад
 Нув' сэхэхэд
 Сит ңэдаидм',
 Сит нядаидм'.

Ёавка

Ёарка вы' ява"
 Мадавы панэм',
 Падтавэ панэм'
 Пыда мэтараха.
 Яха" пили" хая",
 Хамба" тялана".
 Яна" ненэця"
 Пыдо' мюсериңа".
 Хэңоре"э тир",
 Сямдоре"э тир"
 Ёани мюсериңа".
 Ёэрм яндо' ня'
 Нув' пудавана
 Маренуй ябто"
 Ико вэнпюрңа",
 Едэйкондо' хаха"
 Ябта сёвнандо'
 Тёренанараха".
 Яна" латадан'
 Ёа"ңо малцавондо',
 Махамбаванодо'
 Ёэрм' нарахавам',
 Сырам' наволпадам'
 Тото' малха"на
 Минрериңадо',
 Харто' ярихито'
 Соя"марихито'

Паромбариҗа"нё.
Ябту" тотрев',
Җа"ну" тотрев'
Су"лякоцина"
Мэберкаявы" -
Тэвнана" ни" җа",
Хоё" сyumб" нимня
Харто' сянэсумби",
Тэри сысумби".
Җоб" нядэ сую
Яха' лаң' ниня
Нита сарпя' мюня
Тет җэнда ниня
Пыда пындаёрҗа.
Харта небякода
Җока нита ня'
Туро' ханлиҗада -
Ныхы"масыдако
Сяха' няватаңгу"?
Маня" Едэйкова"
Сую' туро' ня',
Сад" поё"мана
Пыда сyрамбинё" -
Нядэ су"ляко
Нита сарпя' мюня

Пуна хаёдаҗа:
Маня" Едэйкова"
Нядэ су"лямда
Сидя' хара ниня,
Җуда' хара' ниня
Тютилебтембида,
Җули" севол"пида,
Харта мя"лихинда
Тэврариҗада.
Мында пеляха"на
Җавлариҗада.
Сава нядаха"на
Пуна митерҗада.
Нядэ су"ляда
Пындаёркава
Тет җэнда ни'
Харта юрколы".
Җока яля хая,
Мядм' тохолаҗа,
Едэйконда ня'
Җоб" макана
Хонёсетыхыма.
Җавкариҗэ,
Тэ"муреҗэ
Пили" нюмдеҗава".




Та'

Мякандо' танэйд"

Ты" нэсырин'
Яндо' хобарин',
Харто' мя"лихито'
Тохолко"махад -
Падна"махад
Теда' танаяд".
Та' ямбахана
Пыдо' мюсерта".
Небя - нисяхато'
Пыдо' маймби"нё",
Нена" маймби"нё.
Вэнекохортадо'
Майвандо' сер',
Пыхыдато' сер'
Хаво нямзялемби",
Тэв халмо"лаңа".
Сыра' ямбахана
Нэсы' жаңекеы"
Пюл"махадандо'
Хонравандадо'
Нани' харта жока.
Жока тыто' ня',
Су"лякохото'
Сылаңгариңа".
Пили" нюдякудо'

Тохолковы нито' -
Нито' падраку
Манэсалвы",
Ханзапюлвы".
Маня" Едэйкова"
Нита букварьм',
Нарка букварьм'
Лискулавы,
Хури сававана
Манэсалвэда.
Пыда хамэда
Нули" я"амъяда.
Тохолковы нида
Сита мание
Харто' писяңгато'
Харцаңгариңа"нё".
Няхатата жарка
Тохолковы нядо'
Тарем' толаңада:
- Тохолко"ма' пуна,
Та' ямбахана
Маня" нисянана"
Нядабариңгува".
Нэрм' яханана"
Манзаява" жока.
Хар"на" нюдя нина"
Тохолкова ня'
Тохоламбаңгува".



Маня" Едэйкова"
 Тэри пысаңгаңа:
 Сэвкохоюда
 Пидебихиюда -
 Меңга' то"олхаха'...
 Ҳэсы' җацекы"
 Едэйкондо' ня'
 Варё' җэва' ниня
 Ҳока лахарюдо'
 Тэри вэрыбидо'.
 Маня" Едэйкова"
 Падрода ня"амба
 Ҳавканда хэвхана
 Пыда хонёриңа,
 Ҳарҗолида
 Пыдабты"ма,
 Пыда җани'
 Юдэрҗава:
 Школахана
 Тохолкурҗа,
 Падна, толаңго
 Ҳули" саць тенева.
 Нида сита мание,
 Тэри ти ванебтюрҗа".

ЕПДЯ" ТЭВЫД"

Та' ёльцьҗгана
 Вы' яханана"
 Танда җули" сава.
 Ҳэрм' яляхана
 Яра сяд' нимня
 Ҳэсы' җацекы"
 Сянакулбато'
 Енядато' пуна

Таб" хадаридо'
 Пундо' хаюрцеты".
 Неняңгахабидо",
 Ниберёхобидо"
 Сёдо' ханабато',
 Тире" ядаха"на
 Лэбтариб"нандо',
 Пэдём' нэкальито'
 Тамна яңгосеты.
 Паденя тына"
 Вадо" ёркахана
 Сюрнакохондо'
 Вынхаласеты".
 Мерця' җабт' нири'
 Нэкалиб"нандо',
 Еси маторпа
 Тидхалербато'
 Вэно" ямыбада",
 Нена" сахамбато'
 Вы' хоё" тяха'
 Ҳэдарабтамбада".
 Ҳэсы" җацекы"
 Теда' тэтнаңа":
 Якэ' пуркана
 Тыдо' пэръядо' -
 Неняңгада яңгу,
 Ниберёда яңгу,
 Ты" нылана",
 Ты" нямзена".
 Тарем' мэнахандо'
 Неняңгато' иры
 Пили" ныкалаңгу.
 Тикы иры' пуд
 Пилю" тилаңгуд".
 Ҳэсы' җацекы"
 Ты" тяхарина,
 Мядо' хэвхана
 Сая' пыя' ни'

Ярэй' таб' ни'
Сэр" ты' хоб
Пыдо' лехэбтярҕа".
Сэр" хоба ни'
Пилё" ҕамдорта" -
Пилю" хадабава
Харто' нянариндо'
Ңули" илекако.

Халям' хадабада"

Ңарка вы' яна"
Сёнзякода лата.
Токоцяхабида
Тан"мэкораха".
Я' ханярина
Пилю" сэвраха".
Халякоховадо'
Тяхаринда ҕока.
Халэтахабито'
Итё" манзараҕу:
Халя' сан' мяра',
Халя' пехэда"ма',
Ябцо' пикада"ма'
Хамба" хумбараҕу".
Ңоб" ҕэдалёда
Ңаном' вадарҕанё",
Тон' ҕэдалынё".
Такы то' варрин',
Сая' пыярин'
Нултариҕада.
Ңуво" понливана
Халя" пехэдарҕа".
Едэйконд нися
Едэйкорихинда

Тарем' лаханаҕа:
Мань, Едэйков,
Мань, сава нюв,
Пыдар сыркар",
Инзелехэркар":
- Халя' санорҕа"нё",
Халя' сянаку"нё".
Поҕгам' пэмбаир
Хой' ҕано' мю'
Ңули" сенасико".
Мари" ихирмана,
Ёря' тэлхана
Халя" хантаҕа".
Ңули" тёмбявана
Ңаноконди' мю'
Пыди' ҕамдаяха'.
Янамбокована
Лабя" тяланаҕа".
Маня" Едэйкова"
То' вархана
Поҕга"хадариҕа.

Сарпя"

Вы' яна" хойхана
Сарпя харта ҕока.
Яна" сарпи" мюмна
Ядариб"нанда"
Тосарисетыда".
Мараҕгахавар,
Тудокоховар
Ныхы' тяха' ҕока.
Вы' яна" лабта"
Нойдавэраха",
Ңодя" сарена".
Теда' тюку яля'



Маня" Едэйкова"
 Юмборода" поё,
 Лахацие" поё
 Нёракулавы.
 Нумда пэвсюмб",
 Пыри' санарин'
 Яля' ха"амриб"
 Ёарка пэта ни',
 Тамальґгана
 Еси" ваґгахав",
 Неру" пармахав"
 Хамэдито' яґгу.
 Ёарка нумгэхэва"
 Ёадимадавэй"
 Тумдаито' яґгу.
 Маня" Едэйкова"
 Мерця' мин' ня'
 Пыям' ґодо"ла,
 Харта мята ґабтам'
 Пыя' ґулаґада.
 Тарцям' нись намд"
 Юмборода' нимня,
 Лахацие" нимня
 Ёэваконда сер',
 Тид" инда сер'
 Ёоб' нэкалпида.
 Сейкоховада
 Хади" малхана
 Ныдвортараха.
 Пармам' манэ"ґанё",
 Тикы ґамгэ ґэса?
 Пэвдякохона
 Ёавканда туром',
 Тэ"муре"э' туром'
 Хамэдариґада.
 Харта ґавкада,
 Пыда яґговамда
 Хамэдахава

Тэда торивы,
 Сита ґулавы.
 Ёавканда ня'
 Ёоб" еґгавана
 Пыди' ядґаха'.
 Маня" Едэйкова"
 Ёавканда ня'
 Теда' тюку яля'
 Ехэравы сарґям' -
 Ехэравы недам'
 Пыди' ханавэхэ'.
 Ёэвакути' ни'
 Ябта тэсриґа.
 Иринати' нудо'
 Пыди' нёдаґаха'.

Школан' хэванда нерня

Маренуй ябто"
 Иба ёто' ня'
 Пыдо' нэкалпидо'.
 Маня" Едэйкова"
 Инда ядэртан',
 Ёэваконда ни'
 Сава нув' ерт
 Хэґо" мундрев' -
 Тире" мундрев'
 Ёамгэ"яхава
 Яльцедаванода.
 Вадон' ёркарин',
 Ёрколалван'
 Ялэ" ямбаха"на
 Натевэдо' ґано -
 Вертолёт ґано

Ти Һамдо"тана.
 Һэсы' Һацекеы"
 Тохолкориванзь
 Пыдо' хантаҥа".
 Тохолкориванзь
 Маня" Едэйкова"
 Тиртя Һанохона -
 Есям' тотыхана
 Пыда хантаҥа.
 Һарка вы' ямда
 Тире" панахат,
 Пулю" ядахат
 Мэта мантанда
 Манэтариҥада,
 Вэдетариҥада.
 Вы' янда еси,
 Вы' янда лапти
 То" ицавэй',
 Сарпъ" мюсавэй
 Манэтарияда.
 Маня" Едэйкова"
 Тиртя Һано' мю',
 Еся Һано' мю'
 Тэри сакадаҥа.
 Тиртя Һано' луца,
 Һарка Һаном' мэта
 Тэри ванебтынё",
 Манда' то"олханё":
 - Маня" Едэйкова"
 Нена" савананё",
 Хамэдёвэнанё"
 Тохолкова' ня'.
 Теда' тараҥгува" -
 Пулё - тире" ня'
 Тидхалеҥгува". -
 Маня" Едэйкова"
 Надораха тире,
 Яв' харэлаха

Харта мание
 Тэри ванебтынё",
 Харта пысамбинё".
 Һарка вы' ямда
 Саҗо' ма"алпида,
 Пыдо' няриндо'
 Манда' то"олханё":
 - Һэрм' Һацекэця",
 Янда" сехэры
 Ненза явнанда
 Пили" нёдаҥара".
 Харта вадакора"
 Тохоламбаҥара".
 Саць саавана,
 Илебядёри
 Харта" илеҥада".

Ниди' пюрҥаха'

Маня" Едэйкова"
 Тохолко"ма пуна
 Вынд' ялцеты",
 Тид" ядсеты.
 Һарка вы' яда
 Сита хандараха
 Пили" Һэсеты.
 Хоё" поё"мана,
 Сэси" ваҥго"мана
 Пя ламбахана
 Пыда ядэрцеты.
 Нядэ сотэ' ниня
 Харта Һамдёсеты,
 Нув' тире" ня'
 Пыда сырцеты.
 Мюсенако тире"

Ханзапасетыда,
Маниесетыда.
Маня" Едэйкова"
Тарем" мэба"нанда
Нема' юдэхэна
Харта Һавкамда
Маниенараха
Пыда Һэсеты:
- Пыда Һавкада
Мята хэвхана
Няда соядада'
Няро"тялаяда,
Харта ервкомда
Пыда Һатериҗа,
Ид" хайлада
Хамдомбадараха".
Нита поё"мана
Туросумбасеты,
Харта ервконда
Һудо' пюртараха
Пили" Һэсеты,
Мерця' выврёхо"
Инзелерцеты.
Иры' яляхана
Ядэсумбасеты.
... Нядэ Һавкада
Һаво" пиркана
Иры' яляхана
Һаха" нэкалҗада.
Нявотаб"нанда
Мерця' минраха,
Һэкцяхабида
Вы' хой' нимна
Ям' ни" хомбю" -
Пыда ервкомда
Пюсь нэкалҗада.

Еси хоб"нанда
Тид" маторпида,
То Һохолпида.
Синё' тахамана
Тяха' нэкалпида.
Нерданда ня'
Неру" пармраха
Һэрм' илебцие'
Пили" манэ"яда.
Ты" илебця"
Нямдрихи"нато'
Маня" Һавкава"
Тю"у' илаҗадо'.
Хар"на" Һавкава"
Харта сёбарась
Нена" халцукэсь:
Тет Һэнда ни'
Нусь ха"аманим',
Һани' сана"ним'.
Илебця" нида
Хаця" тосалҗадо',
Хамэдариҗадо'.
Ненадорка Һэвэ,
Тосакабтаркавэ.
Хуна мальҗгана
Хибя няхавамда
Һэдаҗодакы?
Харто' няридандо'
Пили" ня"амаҗадо'.
Теда' лахана
Маня" Һавкава"
Илебцялиҗэ
Пыда ядэлиҗа.
Сита пир няда,
Ныхы' пир"мана
Харта яҗгориҗа.

Пудана вада

Торикоко сыра
Ѓарка вы' ява"
Пили" тондаҥада.
Ненэця' ню'
Тыто' ню" ня'
Сехэрэто' тарка"
Харто' яҥгариҥа".
Теда' ҥадьбята
Маня" Ѓавкава"
Илебцялиха"на
Таня илеҥая,
Таня ядэрҥая!
Маня" Едэйкова"
Ѓарка падаркана
Тоходариҥая.
Ирината недам',
Вавлѐнда еҥгам'
Яныбариҥая,
Таня нѐдаҥая.
Маня" Вавлѐва"
Ѓарка падаркана
Теневавы нэб",
Тохолковы нэб"
Нись ёхоборт -
Тид" ядаҥгусь.
Харта янда тер
Яля явнандо'
Тарпараҥгудась,
Ѓадимдеҥгудась.
Тире" поё"мана
Пыда тиртаҥась,

Яво" сёр"мана
Ѓанэртариҥась,
Вы' янда латадан'
Ѓэдалёртҥась.
Ѓаре" тикамбон'
Ниць хэбилеҥгу",
Нись выдараҥгу".
Маня" Едэйкова"
Хуна мальҥгана
Харта янда тер,
Вы' янда тер
Пунда вэтабаҥгу,
Маси" тарця нэҥгу!
Теда' ҥадьбята
Ѓули" сававана
Пыда тоходаҥгу.
Ѓаре" тандаяри'
Хэвы яляха"на
Мун" тэбкада",
Манда" тарем' ма":
- Маня" Едэйкова"
Харта янда сёе
Падыбадараха,
Сём' ханабата
Яха' енд"лаха
Сёда нэдараха.
Вы' янда илм'
Тяха' вэтаван'
Ида харвариҥа.
Вы' явнанда,
Янда тер"мана
Ѓэдалёрма' ня'
Ятнаараха.

ЕДЭЙКОНА" НЯ"
(НЯБИМДЕЙ ПЕЛЯДА)

Вада' саирмана

Маня" Едэйкова"
Лаханакодарем',
Ярабцадарев'
Хынабтамба"мава"
Мале хубтемянё".
Тамальгана
Лэда нюдярисы,
Ни"ня" сяр"ман'
Ѓодь" тэврысы".
Ѓаре" тей яля',
Мерця' ядэлана
Нянзяда мынико
Мань хани син',
Сидя хан син'
Мерця' сёвнанда,
Мэта сёвнанда
Харта янгерҥась,
Тарем' хыно"ҥась:
- Маня" Едэйкова"

Ѓарамгаявы. -
Хурка мань нод"
Мунзь"махадани
Тарцям' намдари
Луца' то' лэми -
Паднабцякоми
Ѓани' нэкалҥав,
Мань ня"амаҥав.
Яни ҥацекеы"
Едэй илаҥгана,
Интернатхана
Хурка' илевамдо'.
Мал' падаҥгув,
Тид" хэтаҥгув.
Тикы падыба
Маня" Едэйкова"
Иле"мяха"ната
Си"ми нядабаҥгу.
Тикы падыба
Луца' то' лэми
Тэри халмарта,
Харта варнаҥгу.

Нерденя" сер"

Нарка вы' хой
Си"ив' нэсолин'
Сит вадабаңгу.
Си"ив' походанд
Тире" ядрихи"
Нарка вертолёт
Сит илариңгу.
Тире" панхат,
Вертолётхад
Ян' хамы"кана,
Нэ' таны"кана
Няби небяданд
Нев"мандакор
Сит ядабтаңгу.
Няби нудахана
Сит валтаңа,
Ёнли теклаңгу.
Халтаңголава
Хардандо' ня'
Сит тэвраңгу.
Вы' хойхана
Халтаңгори
Ехэра"махад
Сит халтаңгу",
Пыдар матаңгун.
Саля' яв' и",

Ёнзартана и",
Ядембада и",
Лахананараха:
- Нядхавадани
Нёхорцяп пин",
Пыдар сикавамд
Халтариңгудм'.
Мыласавэ ит'
Сэв" ибцьхамб" -
Тикы сер' ни ңа",
Хар"ни тэтҗав,
Халтариңгув,
Нянзахалтаңав.
Ид' ипикако
Сит юдариңгу,
Нјули" сава нэңгу,
Тохо' панэдамд
Теда' сераңгун.
Ханзер" серыбавам'
Тохоламбаңгун.
Маня" Едэйкова"
Ңамдёрця' ниня
Пыда ңамдёри
Харта мэ"эмандида
Пыда панэцида
Тасламбаяда.
Ной имбытата
Ңая' няримна

Пыда серҗада,
 Сэр" имбытата
 Нянда таҗгаҗэ
 Ти серҗада.
 Тобъява нимда
 Пыда сярҗада.
 Сидя харнакада
 Харти' няхатати'
 Сядоларёдако'
 Пыди' то"олхаха' -
 Сидя хэв' ня'
 Пыи' паҗгарё'
 Сервэхэюда.
 Луца' савацямда
 Пырдарией'
 Пыда сервэда.
 Маня" Едэйкова"
 Тэри санарҗанё".
 Җацекеы" нида
 Харто' ханьре".
 Писяндарихиндо'
 Җули" енаҗга".
 Небя' е"эйҗэ
 Сиддо' пэртядо'
 Саҗо' малхана
 Мал' манэ"яда,
 Мунзи" тэбкада"...
 Сиддо' пэртядо'
 Манзь ханаҗада:
 - Небо' тоб"нанда"
 Җани' тарцядаци",
 Мал' җэб"нанда"
 Ехэрана илм'
 Тохоламбаҗада".
 Тюку сава ил'
 Тамна сава серк"
 Сидда" тохолаҗгу.

Хонёлавахана

'еда' товы җацекеы",
 Школа' илам' ехэрана"
 Хардандо' лохо' мюмня
 Тосарка ядэсумби".
 Маня" Едэйкова"
 Хаця" тосарка,
 Тёня' пяны"мана
 Пыда сысумби.
 Ябто' ядабцамда
 Җани' мэ"элвэда.
 Сидя сэвримда
 Пыда нёраку"җа -
 Манэ"манда җока.
 Хардандо' ядхы
 Хуҗго' юдалаха
 Есь" ютеркаби -
 Ядембада есь,
 Яленана есь
 Пыда хорпида,
 Җуда' хорпида,
 Идя хэбилей":
 - Хурка ту' пясин",
 Ту' лэёсико"
 Ханзер" ядемы"? -
 Җуда' тебнана"
 Харто' ни" җа".
 Җани, лохо' мюня,
 Җэва' ний латахад
 Самбляҗг тарка нумгэ'
 Наръяна ялякомда
 Сэв' ти хаю"җадо'.
 Хонёлавахана
 Сэр" тохо"кана
 Ва"ав" синдавы",
 Сыра' сермахана

Тэри морена".
 Яля' ямбахана
 Манэ"манда жока.
 Няби' сылава'
 Нумда пэвсюмэ,
 Ялэмдата ябцо
 Пакалахавы".
 Пыдо' хонаванзь
 Теда' хамекуржа".
 Маня" Едэйкова"
 Тасий лата' ни'
 Хона"махаданда
 Тю"у' вэн"надо'.
 -Хонёлава' ни'
 Хонабтаринадо'.
 Едэй ва"ав ниня,
 Нэл' сыра' ниня
 Хамбаранараха.
 Хамб" нэв" нимня
 Хув' пядарев' -
 Пэхэрэдрев'
 Ху"лёдараха.
 Ти пя ебц' мюня
 Пыңгэртакореха.
 Янамбокована
 Нэмунизикода
 Тэводариңада.
 Маня" Едэйкова"
 Парондэй" нимня
 Нэдалёдараха.
 Парондэй" тяха'
 Хан сакадаржа,
 Хан яльцедаржа.
 Нэл" сыра' ни'
 Маня" Едэйкова"
 Ти ян' мантэй".
 Тад сидёванда
 Хонёлава' нид,

Ва"авконда нид
 Мантэривы".
 Хонёлава ва"ав,
 Саңганана ва"ав
 Ся"ны хонё"мада?
 Тарця ва"авм' мэць
 Нюдя нэбыхында
 Тохобэй ни жа".
 Мяд' мюй пэби -
 Нарыкабтарка,
 Макодада сиси.
 Тарця лохо' мюня,
 Тикы мяд' мюня
 Нули" мохокабты,
 Пэдём' нэдарась,
 Харе" индакартам'
 Нэкалана ни жа".
 Тарем' мэнаханда,
 Ибедортаханда
 Маня" Едэйкова"
 Нема талевэда...

Сиддо' тохоламбда

Ты' сеңгадарем',
 Хан' сеңгадарем'
 Сеңга тайна,
 Сеңга нурна
 Сеңга' сёвнанда.
 Сеңга ма"лкуржа -
 Классандо' мю'
 Мал' жацекеы"
 Ма"ламбаяда.
 Тохолкода не'
 Сыдорота нэбт"
 Хаця" ялмавэд".
 Сидя паңгалярта

Ямб" хунилах".
 Тохоламбувнида
 Сита хамэдаңа",
 Ёоб" сидя' мэва'
 Вы' явнандо'
 Ёэсы' һацекеы
 Ма"ламбабата
 Сита манэ"мы".
 Тарэнзявнанда
 Ненрудхава
 Ниняраха һа".
 Саңо' малхана
 Пэ сэв" тяха'
 Иськабтадаха"
 Сылаб"нанда
 Тохоламбадида
 Хаця" тосариңа".
 Тохолкова серо
 Пили" ваде"яда.
 Лаханаб"нанда
 Теневаривы,
 Ненза явнанда
 Нена" пэрңада.
 Вада' хытыркавам'
 Ёэ' таны" тарем'
 Тасламбаңада:
 - Ёарка вы' яна"
 Сарпя" саңгово"һа",
 Я' сэрермана
 Сарпя" падахэй",
 Хусувэй хибя'
 Илевахананда
 Харта сарпякуда,
 Сарпя" танияваңа".
 Тэри тарцяха"на
 Тохолавдавэ',
 Хамэдавдавэ' -
 Сарпя" нёданана"

Харто' ни" һа".
 Тарця вади" хари
 Хэт"махаданда
 Ёоб" сяр' мэва'
 Нултариңада
 Ёэдалёвэдарем'.
 Инда ядэрабцом'
 Ёльце"махаданда
 Манзь ханаңада:
 - Хэвы илаңгана
 Сер" танияңаць,
 Хар"н иле"мами
 Мань хэтаңгудм'.
 Мань нисяеми
 По" тиңгыхы"на
 Тэта хибяха"на
 Недватаңась,
 Манзарариңась.
 Ёарка тэтаконда
 Няда' яңгацянда
 Ёэваконда ни'
 Ёуркадарцеты.
 Пыда марцьханда
 Хо тюрхава
 Няхар" ютер"мана
 Ёока' мальсеты.
 Мань нисяени
 Танзавэй' сыра'
 Недвападада
 Вата һамгэхэва
 Пили" яңгосеты.
 Хусувэй по'
 Ёатебярихи"на
 Пыда хаюрңась.
 Харта һэта ни'
 Нульць я"амаяць.
 Маня" мя"на тер"
 Сэрдахавар

Сохомдабидась.
Тир" пандарем'
Ѓэваку"на ниня
Ѓыдёдархась.
Ей"на" си"мна
Нумгэ" ѓадыѓаць.
Ея мя"на" мюмня
Пэськодареv'
Мерця' выварѓась,
Харта сюдарѓась.
Пуна хонабцяна"
Яѓгориб"нанда,
Тецьда икана
Мэн' харвабцуна"
Ѓэдарамбинаць,
Ланаламбинаць.
Мынд выдара
Мань нисяеми
Ѓани тэтарин'
Си"ми ханаѓась,
Пыда тарем' мась:
- Харт пыхыдамд
Танда ѓэсо"лин'
Ѓавламбаѓгур,
Тюку тэтахана
Хаёданакэн.
Маѓгабадаѓэ
Нув' ёльцевэва"
Ѓэриданакэва" -
Ид" хайлани
Ѓяби пеѓгананда
Мунзи" тэ"эйдась.
Иням' вэрдась
Сёбя' хыѓгырманна
Мань няюни
Ѓоб" хэдамъяць.
Тэти" хабиѓэ
Пили" хаядамзь.

Мэта панэцини
Тату" повавы'
Пили" то"олхаць.
Идм' хосаява,
Сехэм' тэвабава,
Пям' сирыбава
Писавэй яля'
Манзаяридани
Тэта таславэ".
Ѓуда' маха' нимна
Моёпада лы
Тохобаб"нани
Тивни малан'
Ѓавормаехэвам'
Ехэраѓавась.
Немам' нись мэс"
Толырци' ёнарм'
Ерамбасетыдм'.
Сея' пахаѓгана,
Вэно" понлихина
Хонёрисетыдм',
Яворихидандо'
Мань юсетыдм'.
Ѓаво" пиркана
Тарем' илевами
Мань нисяени
Сидя хаво" сихи"
Тэбкадаривы.
Мэць сава тыда
Пыда подермы.
Мань тарцяѓэ
Пыда нерданда
Ти сюрамбидм'.
Мэта панэцини
Тире" панраха".
Нин"мянда ни'
Мань пындеръяв",
Мунзи" ярумадм',

Вадам' нидм' хэт".
 Мань нисяени
 Няби сята хэв
 Пидрев' хэвэ.
 Тэта - ервхани
 Вадам' ни' мэс".
 Хурка мунзипой"
 Хан' вэ" ня'
 Вэ"ми сакада.
 Хар"ни' мя"лихини'
 Мани' тэвъяни'...
 Ҳаво" пиркана
 Манда" тарем' ма":
 - Вы' яна" ни'
 Совета"на ил',
 Ҳарка сава ил'
 Теда' Ҳамдота.
 Нюдя Ҳацекеы
 Ҳарка падаркана
 Тохоламбаңгудо' -
 Мань нисяеми
 Тохолкодаха"на
 Си"ми Ҳэдара...
 Тохолкода нява"
 НултариҲада...
 Тохоламбадида
 ҲацекеҲихита
 Мунзи" сылы".
 Сидеранда ня'
 СаҲо ха"амвы".
 Ҳарка вы' хой,
 Вы' янда хой
 Мар' хобадарем'
 Пыда нерданда
 Лэхэбтёдараха.
 Вы' янда нимна
 Мерця' сёвнанда,
 Мерця сюдармонда.

Тарем' мандараха:
 - Янд Ҳацекеы"
 Я' илермана -
 Ила' саирмана
 ТохолкориҲая",
 ҲамэкориҲая".
 Тэри Ҳамдёвадо'
 Пили" яңгоҲая.

Нита ня'


Ялэмдад' Ҳэва'
 Ҳадимлихива,
 Сидя Ҳэто' ни'
 Санарисетыд".
 Саля' яв' и",
 Ҳарка яха' и"
 Пыдо' мято' мюня,
 Трубито' мюмня
 Лохортакораха.
 Нито' сяр"маха"
 Пыдо' матсеты".
 Саля' яв' и",
 Ҳарка яха' и"
 Харта высылпида,
 Мурюмдамбаяда.
 Ход' тебхавам',
 Ханьтормахавам'
 Пили" юраңгудо'.
 Маня" Едэйкова"
 Хад' Ҳэвахавам' -
 Едя' хурка Ҳэвам'
 Ехэрариңгуда.
 Тохолкова' ня'
 Ида Ҳоб' Ҳа.
 Сита тэвравэ

Верталёткомда
 Харта падарканда
 Паднабцяўгана
 Падтаривэда:
 Тире" ядхана
 Тэри ти лярцьне.
 Маня" Едэйкова"
 Классанда мюня,
 Пыда җамдёвамда
 Нема' юдэҗэ
 Мэта' то"олхада.
 Тохоламбадида
 Тохоламбариҗа.
 Ида ядэлиҗа
 Хумна - таняримна.
 Нид нибкалэ
 Хаця" немгалавэ".
 Тохоламбадамда
 Тохолаварин',
 Хамэдаварин'
 Нена" харвариҗа.
 Вэва тохолкодам'
 Пыда нюбе"ман'
 Җули" ни харва".
 Харта сякананда
 Җамгэ ядембада
 Җэридаҗгутида".
 Җаре" тедахава'
 Җамдёдарихинда
 Хонараривы",
 Юдэм' мание...
 Сидя сава няда
 Сита сидеҗаха'.
 Коля луца няда -
 Луца җэваханда
 Сёнзя сава луца
 Ёнли теклынё".
 Петя - иськабты,

Вы' ненэцяко
 Пыда җэбыхында
 Харта тарем' ма:
 - Сянакорихива",
 Падарм' тохола
 Сит нядаҗгуни' -
 Тикы' таля'
 Пыдо' няхар"җэ
 Сянакосеты".
 Пыди' сидяҗэ
 Едэйкомди' нямди'
 Нядабасетыди'.
 Ненэця' вада
 Луца' вада' ня'
 Җоб" хэвхана
 Пили" ядаҗаха'.
 Едэйкохонана"
 Тохолкова сер"
 Серо" нерде
 Харта серта сер'
 Пява' мальҗгана
 Сэбинеркаҗась,
 Тоенаркаҗась:
 Җарка надо' ни'
 Танабаривана
 Хаця" саҗговоць
 Танатанараха'
 Пыда то"олхась.
 Сэхэ' ёльцьҗгана
 Сит нядавандам'
 Пыдар пюртҗан.
 Тарця сава нямд
 Нёр юрыбюр".
 Сит нядабада
 Няр тараҗая,
 Пон' тенерид.
 Тикы вада' харам'
 Ядманд мюня"

Нёр хаебюр",
 Ядэрманд сер'
 Нёр тапахал"...
 Маня" Едэйкова"
 Петя нянда ня'
 Тубкам' силпаварим',
 Туросатаңговам',
 Ханм' сертабавам'
 Манэ"лабтаңади',
 Ехэравы нямди' -
 Коля сава нямди'
 Миръя манзаян',
 Сава манзаян'
 Тохолариңади'.
 Пыдо' няхар"нэ
 Ёоб" ханакоцям'
 Хой' ханакоцям'
 Ёули" мел"мана.
 Хурка тебсико"
 Сертариңадонзь.
 Ёарти' хобаха"на
 Садариңадонзь...
 Ёани' ёобугуна
 Пыдо' няхар"нэ
 Хаця" силмара
 Мято' няюв'
 Пыдо' ядаңаць:
 Вэн' хани' мунм'
 Пыдо' намдаңаць.
 Сыра' сава ерня,
 Тецьда нумгана
 Тахабэ харад',
 Латата нылад
 Нюкця вэнеком',
 Тарцяда вэн' нюм'
 Пыдо' хориңаць.
 Я"лёда яндоком',
 Сёрно вэнеком'

Школахандо'
 Тэвраңадонзь.
 Хибяхава мамондась:
 - Сёрнона" танияя,
 Луца' нюмда танияя -
 Уголёмк' нюбе"ня,
 Ёули" саць париде,
 Ята"мако' то"олхако.
 Хонёлава мя"на" мюня
 Пыда тания илеңа. -
 Хибя' пин' ядэлавам',
 Хибя' саць манзаравам'
 Тасла я"амңадо'.
 Лат халтамбададо'
 Мунзи" ти сэв"ңада,
 Уголёмк' манэ"ңада,
 Пин' пили" питарңада.
 Маня" нани' Едэйкова"
 Пыда тарцям' манэ"лись
 Вэнда мят сертаңась.
 Тыта мяд няюмд,
 Ёарка вы' хойхад
 Вэндо' няд тэвра".
 Ёарханда сэр" хутё,
 Сидя хари париде,
 Ти, Харим' нюбе"ла.
 Маня" нани' Едэйкова"
 Сидя нямда ня"лида
 Ханакондо' мэё саха"
 Сидя вэндо' сярсеты",
 Ханакон' подерцеты",
 Хадриндо' ныламсеты".
 Танзерарка хад' тяха'
 Пыдо' пили"
 тяхамзеты",
 Тёрридо' минзеты:
 - Хусь-пырь!
 Хусь-пырь!



Сармикато' лохоко

Тохолкулавандо' -
Хардандо' мюня
Поңга' сэвраха
Еся' тяхарина
Я' сармикэци"
Мир" хуркарико":
Хурка сенасико"
Ҳахаңота ниня
Нохо ядэсумби.
Нохо ңэваханда
Вэбты саңохона
Сылаңгариңа.
Ваңготанда мю',
Еся' мята мю'
Сакадарисеты.
Хэврихинанда
Сэв паңгу нявэ.
Паңгу тэвасико
Сидя паңгуцямда
Муңголабтамбида.
Ята"мархаха',
Сидя ңарка хамда -
Хаво яро"лаңа,
Тэри васо"лаңа.
Нита поё"мана
Сидя хэвханда
Хаця" хаваңга
Ябто ядэсумби.
Хаця" ненарка
Поңга' сэврахам',
Мэё еся поңгам',
Есям' сякалцеты,
Хой' ханедаха"
Ҳобо" төресеты".
Вы' хой' ня'
Икам' вэнцеты.

Вы' ярихинда
Харваринакы?
Манда' то"олхако:
- Тарем' сярвава",
Сяха' ёльцеңгува"?
Хар"на и"на" сер',
Харвабцу"на" сер'
Сяха' илеңгува"? -
Ваңготанда мюд,
Мэё мята мюд
Вы' сеңг нохо
Ябтом' мание
Пыя панорта.
Пя' таряхако
Харданда мюня,
Мядиконда мюня
Харта илериңа.
Харв' нахараку
Тив" мед"пида,
Лакадалаяда.
Поңга' сэвраха
Еся мяд' мюмня,
Харта тэвакомда
Пуй лабяңэ
Мэта' то"олхада.
Саналаб"нанда
Сисьда наровна
Няво"тартараха.
Ҳани' ңобңгуна,
Маня" Едэйкова"
Сидя нянда ня',
Хурка сидяңгаси"
Пыдо' ядэрңаць,
Идо' ядэрңаць:
- Харта инда сер'
Иб" ңэдараңгу",
Хой' сармикэця
Пыда вуни ңа"... -

Пэдара' таряхаком'
 Ты" лекаран'
 Манэ"лабтаңадо":
 - Мара" таривэра",
 Теда' савумдаңа.
 Няра" савумдаңа.
 Няби яляхана
 Таряхакоцяр
 Майвэдарев'
 Едэйко' марць' ни'
 Ёоб" хэртабтэй".
 Мал' жацекеы"
 Тарцям' манэ"лись,
 Майвандо' нид
 Таряхандо' лохом',
 Тамна сававана
 Пыдо' сертаңадо'.
 Мята сиди"мана
 Няд лехэбтярңа".
 Мята мюйхавам'
 Пэдарадарев'
 Пыдо' сертаңадо' -
 Тар" лахацие
 Ёани' жабтярңа".
 Пюнзи" мал" нимня
 Таня' санарңая.
 Ларасако' мюня
 Няңгараха сырам',
 Ёэл" сырахавам'
 Пыдо' тэвраңа".
 Коля няхавадо'
 Малсяда яля'
 Нё' тяхарина,
 Харданда мюня
 Понзи" хутармонда.
 Яля' талкадась,
 Нумда пэвсюмзь
 Таряхандо' мяд'

Лохо' няби ёнд'
 Сюрня колёсам'
 Ёабтариңада.
 Пэдара' таряха
 Сюрня колесо'
 Сюрхалма' сер',
 Ихид мерець
 Таряха нявоты
 Сюрня серев'.
 Ёряко тэвада,
 Тэва лэнзенаңа,
 Тэри хутенаңа
 Пыхыданда сер',
 Нявотава' сер'
 Хава нямзялевэ.
 Харта пыхыдамда
 Пэдара' помна,
 Нявотадаңэ
 Пыда пэртякэ.
 Саць пяталпата
 Нултамбаңада,
 Сидита нямна
 Сысумбасеты,
 Хаевы ёда
 Тумдодасеты,
 Мандараха ёэңгу:
 - Ёыхы яхана
 Хэнярахадамзи"?
 Неры яханани
 Тамна мэвэдамнё"? -
 Тэри пысамбаңгу,
 Ёули" пятариңгу.

Мядонда

Вы' яна" нимня
 Юн' вадахава"
 Тотнакораха"

Пили" нэсеты".
 Юн' вадахаван
 Ни" сиесету".
 Тарем' маманодо':
 - Едэйкона" нися
 Няхаромдэ яля' -
 Яля' тяхакуна
 Мэць сава тыда
 Пыда подермы.
 Теда' тюку яля' -
 Яля' сава ерня
 Нултариңгуда.
 Тикы ваторо"мам'
 Нида тыхабтаңгу",
 Тикы яля' ёльцям'
 Нида тальтеңгу".
 Ненэсянда нод"
 Классандо' нём'
 Пили" нэриңада.
 Едэйкондо' нися
 Хаця" тосарка
 Ыамдёрця' ни'
 Пыда ыамдо"та.
 Тохолкода нюда
 Манэ"манда сер',
 Майванда сер'
 Тарем' ханаңада:
 - Маня" ыавнана",
 Теда' тюку илм',
 Совета"на илм'
 Тэводаб"нана"
 Ныхым' нись сяй",
 Пили" тидпой'
 Манзараңаваць,
 Илериңаваць.
 Теда' вадёдана"
 Тохолкодриңа",
 Сава илаңгана

Харта" илеңада".
 Мань ихинани
 Лаханакодарем',
 Харта" янда" илм'
 Вэтабариңара".
 Хуна мальңгана
 Харта" сехэрэда"
 Ерыбаб"нанда",
 Ыудонданаңэ
 Тарариб"нанда",
 Ыарка недармем',
 Ыарка сехэрым'
 Нёдариб"нанда"
 Вы яхананда"
 Нида" тапаёрт",
 Нида" ёхоборт". -
 Тад тикы' пуд,
 Ыбта саңохана
 Хусувэрихиндо'
 Пыда сырнанё".
 Мал' нюмзавэй'
 Нюда хонрамби,
 Нися' нюмзавэй'
 Ыули" хусувэмдо'
 Инда ыылримна
 Тензибтембида:
 - Пыдар мякананд,
 Ея мякананд
 Мядолиб"нани,
 Пыдар Петяңэ
 Пя ебц' мюня
 Ыамдёринась.
 Нюв - ебцотав,
 Ыарамгаявэн.
 Пыдар хэвхэнд,
 Сава нянд нисям'
 Мань сянако
 Нялидаңавась.

Сидя юд' мян
 По" нэсоңгад
 Нобт' тэв"мава"
 Пили" харта яңгу.
 Яна" маңг' лата -
 Я сёнзя таңго.
 Таня илевамда"
 Нохом' ханомонда"
 Ха' намдорңав.
 Тюку һацекеым' -
 Не һацекеым'
 Нив хамэдамбю" -
 Тали иле"ми"ни
 Тяхамлаховы.
 Нуяб"техэрңая:
 - Тензибтеңав;
 Мань тенилңав:
 Ириенда нися
 Мань ирикэми,
 Мань си"ми һод"
 Ты" манзаян,
 Вы' манзаян'
 Тохоламбавы. -
 Навэ лахарюда
 Мэсо"махаданда,
 Едэйкона" нися
 Ядаванда сер',
 Минданда сер'
 Нюта мяд' мюйм',
 Хардандо' мюйм'
 Нули" ханзапа
 Саңом' нэдапюрңа.
 Намгэ ядэрмамда
 Ёльце"махаданда,
 Мэта ханаханда,
 Харта тэрихита
 Пыда няркоманё",
 Манзь ханаңада:

- Мань ханаңгудм'
 Юнм' ханаңгудм'
 Вы' сей"мана,
 Хоё" латадан'
 Нэдарарингув.
 Нули" маймба
 Сава илеңада".
 Тохолковахана
 И' нудормэда",
 Тохолкориңада",
 Вадёдаринҗада".

Буровоян'


Вы' яна" юрм',
 Вы' яна" тебтм',
 Ту' пяринҗэ,
 Ила' ханзоңэ
 Хар"на" мэлңава".
 Вына" латдан',
 Яна" һардан'
 Ям' сидерпада"
 Пядавэдрев'
 Нарка буровой"
 Хунаданя һади".
 Ти, һоб" буровойм',
 Сэв' манэ"манзь
 Классана" тер"
 Вертолёт' мюня
 Пыдо' тирць миңа".
 Нита понлихина
 Нибя' мал' ниня
 Намдёдадрев'

Коля Һамдәһанә".
 Һарка буровойм'
 Пыда манэ"ман'
 Һули" маймбинә"...
 Һарка вы' ямдо'
 Вертолёт' мюд,
 Тиртя хан' мюд
 Тумдодариҗадо'.
 Хал нумлихина
 Һарка буровой',
 Пирця буровой
 Тута яляхава" -
 Нумгэ" яляраха".
 Пэвдарихина
 Һэдалёртаха"на -
 Яна" терха"на
 Тута яляхава"
 Ёховоҗгадандо'
 Ненадумда"Һэ
 Пили" тарариҗа".
 Вертолёткона" -
 Еся Һанокона"
 Һамдарихива
 Ян' санаяна".
 Маня" Коля нява"
 Харта нисякомда
 Пыда ядабтаҗа.
 Я' Һыларид
 Теда' тарпотана
 Газм' манэ"манзь
 Маня" харваҗава",
 Һули" маймбива".
 Һарка буровой,
 Пирця буровой
 Тэри судараҗа.
 Коля няна" нися
 Манзь ханаҗада:

- Тамна нюдяркада",
 Саць сававана
 Тохолкориҗада".
 Газм' туюлпа
 Манзаравахана
 Саць Һока серм'
 Һули" сава серм'
 Тенева сава.
 Вадәдариҗада",
 Тоходариҗада".
 Тохо"махаданда"
 Һарка вы' янда"
 Сёнзяконда мюня
 Һамгэм' сюрпвамда
 Та' мальҗгана
 Манэтара"ма,
 Вэдетара"ма.

Мань ненэсядм'

Маня" Едэйкона"
 Сава няда Һока:
 Халям' хадаба
 Тохолавы няда
 Һани' харта Һока.
 Хонёлаваханда
 Няби сялаҗгана
 Халям' минерись
 Пыда ядриҗа.
 Невтадо' нядо'
 Сита манэ"мы.
 Техэ явнанда
 Харимадавэй"
 Манзь ханаҗада:
 - Халям' талесан?



Хана"мар ян'
Халя ханарид". -
Маня" Едэйкова"
Тикы' нерцюна
Тарця вадаха"на
Хибя' пэрмы?
Хэтвы" вада"
Сейкохонанда
Хартанараха".
Ид" хайлада
Вэхэда"маната
Сёнзя' тахара,
Мюськодараха".
Пин' тарҕада,
Ѓэваконда сер',
Харта инда сер'
Пили" нэкалҕада.
Сюрамбаб"нанда
Яха"на юхурҕа,
Хавота сихи"на
Мерцяда сюдарҕа.
Ид" хайлада
Тэ"манда яҕго,
Вы' янда мерця
Харта нянзыбида,
Тырабтамбаяда.
Маня" Едэйкона"
Сюрамбаб"нанда
Ѓэваконда нимня
Вында хоркыци"
Тото лабрёри"
Хан"лахавондо".
Сюрамбадаханда
Мерця вырчермы".
Нув' сармикэця",
Я' сармикэця"
Лыҕгарэйда"нё".

Сата хадҕэ
Пили" ладҕада.
Вы' яна" мерця'
Минрена хад,
Сата ҕарка хад
Ңарка парондэй
Пили" ҕонабида.
Маня" Едэйкова"
Сыра - саҕгомдад'
Юталамбадан'
Нема талевэда...
Яля' ямбахана
Пыда сидя няда -
Коля няби Петя
Ңатенанаханди'
Ѓули" тябихуху'.
Тэри пысамбихи':
- Пон' яҕговонда,
Ңамгэ хадкэбата? -
Сидя вэнекодо' -
Хари, Сёрнодо'
Харти' сермнанди'
Пыди' хэбирҕаха'.
Ңамгэм' хэтаван',
Ңамгэм' симдеван'
Харваринакэхэ'?
Ңаво" пиркана
Хад вэркада.
Нумда нярако
Тирсялманё".
Сидя вэнекомди'
Ханакорихинди'
Подерҕахаюди'.
Ңарка хой' ня'
Сидя вэнекоди'
Пярнариҕаха'.
Ѓоб" тёрҕэ
Пыди' илҕади'.

Пэвсюмя' нянэ
 Нумгы" яляхана
 Тэри мирнажа".
 Сидя вэнекоди'
 Лорцэ сотэ' ни'
 Нултарижади'.
 Мертякована
 Пися' ваңготаком'
 Сабкабададарем'
 Сабканолъяха',
 Нули" пятјаха'.
 Сыра' ваңгахад,
 Сыра' ңыларид
 Маня" Едэйкова",
 Хар"на" сава нява"
 Пыда вэрцабтэй",
 Ти, ңоб" ванебтэй".
 Харта няхаюда
 Пыда хамэдажа.
 Вэва вадахана
 Вомдавы сёнзя
 Харта ңэсоңгда
 Ёани' тахара.
 Тад тикы' пуд
 Ёаводы' пон'
 Ни' ярсумбю" -
 Письлида ңамды.
 Пыдо' невтадо'
 Вэва вадаха"на
 Лахана"маримда
 Хамэдахава
 Едэйкон' маси":
 - Ёэрм' ненэцие"
 Хэд" ңэвахад,
 Тид" мимахад
 Ехэрадамзь,
 Ермерижадамзь.
 Ёани яляхана

Вэва вади" хари
 Тэри сэвъяли"
 Нин хэтыбаңгу". -
 Тарцям' намдари
 Маня" Едэйкова"
 Тэри тарем' ма:
 - Вы' яханана"
 Вэва вади" хари
 Намда"маханана"
 Таня хаебина" -
 Тарця табэдыр",
 Сава табэдыр"
 Ирина"на" вато"
 Пили" тенейана",
 Хуна сяхарт'
 Нина" юрыбюр".

Едэй по' яля" ТЭВЫД"

Вы' яна" нимня
 Маданава" пова"
 Пудана ензида -
 Ензи пяривы.
 Едэй по' яля
 Сидя марць' ниня
 Едэй помда минре.
 Яна" ненэця"
 Хадо' мал' тяха'
 Теда' миндя помдо'
 Ядабтарижадо'.
 Хуна мэцьдидо'
 Паны серо"мы".
 Сэр" сокато'
 Пыв' хо"ма яңгу...



Тарць" ямбахана
Маня" Едэйкова"
Сидя нянда ня'
Ѓавэ" серо"мана
Манзарари҃҃а"ма.
Хадэцядо' тэввы"
Яхады' нароход,
Хэвханда ҃ацекеы"
Хэдрев' сюралъяд".
Хадэцяко' ядвана
Ѓоб" ты ядэсумби.
Ханм' ти нюдэр҃҃ада,
Икам' ҃об' вэнпюр҃҃а.
Хадэцяко' тарк" ниня
Нумгэкоця" то"олхако"
Тукоцяко" ялкадар҃҃а".
Пэдарана" хадэкоцям',
Мэкадако хадэкоцям'
҃ацекеы" саву"҃адо',
Нито' нуди ня"амба
Пыдо' сюрхалембидо'.
Ѓавка хабтеко
Хадэця' хэвувна
Ядэсумбари҃҃а.
Мерцянда ҃абт' ни'
Пыям' ҃одо"ла҃҃а.
Пыда пумнаринда
Па҃҃гуй тэвасико
Ти васартако.
Парондэй' пыя' ни'
Сармикадо' ҃од" ти
҃адимли҃҃а.
Ту' морёраха"
Сэв" ялкадар҃҃а",
Тэри палэсумби,
Пили" ҃обесумби
Мэн' харванакэ?
Тибякохобида

Тэри лакадар҃҃а",
Таванариван',
Медтаварин'
Пыда харвавамда
Хытыбадараха".
Няръяна тёня
Тэвасинда ня'
Парондэй' тяха'
Сакадари҃҃аха'.
Тарцям' манэ"лись,
Тикым' хамэдась
Сава Ѓавкава"
Пэянда сармикм'
Тоба' тыбар҃҃ада.
Манда' то"олханё:
- Сармикари҃҃э
Тарця яляхана,
Тюку яривана
Ѓавэ пюли҃҃ан?
Тад тикы' пуд
Мал' ҃ацекеы"
Тумдари҃҃адонзь,
Хамэда҃҃адонзь:
Тёня' пяны"мана
Палэсумбавы -
Коля ҃эривы.
Тэвасико҃҃э
Петя васармы.
Маня" Едэйкова" -
Ты' серо"мана
Пыда туро"мы.
Хари вэнекомдо'
Уголёк' ня'
Сармикадарев'
Емб"мэхэюдо'.
Сармикадарев'
Хари ҃обермы.



Нули" маламбой',
 Вэнекосавэй'
 Хури' маямба,
 Теда' тода помдо' -
 Пондо' нерденям' -
 Саць җарка ялям',
 Нерденя ялям'
 Ядабтариҗадо',
 Помдо' саву"җадо',
 Тэри маймба
 Нули" саву"җадо'.

Я' поҗгана сеҗга"

Мал' җацекеы"
 Вынд' хантаҗа".
 Хоё" тяхарид
 Хан" вэрна".
 Тад тикы' пуд
 Җэдалёби" мюмня
 Вы' хоё" ня'
 Тэри пулаҗга".
 Харто' мяка"нато',
 Туто' хэвхана
 Лахарёхобидо'
 Җабтамбаҗгудо'.
 Җоб" сыра' пеля'
 Интернатхана
 Манэ"мэдо' җока,
 Намдавэдо' җока.
 Тад тикы' пуна
 Хасава җацекез"
 Җавкарихито'
 Есь хантаҗа".
 Не җацекеы"

Тарць" ямбахана,
 Нид тохода
 Харто' небянадо'
 Мадавында
 Пыдо' нядабаҗгу".
 Харто' иринадо',
 Пыдо' хаданадо'
 Сиддо' мание
 Хури' маймба
 Ванерабтёда".
 Пыдо' мандариҗа":
 - Хаця" вадёвы",
 Иҗудормы",
 Вы' манзаямдо'
 Җоб" теневадо'...
 Школахандо'
 Вада" тарем' то":
 - Петя' нисяхава
 Җаха' ямдавы",
 Яда саць хубта!
 Вертолётхана
 Петям' хосаяҗгу. -
 Җаре" Петяҗэ
 Харта җэдалё,
 Ям' ханзапа
 Хэсь харвариҗа.
 Җаре" тикахана
 Хан' вуни таня",
 Пыдо' няхар"җэ
 Сидя вэнм' мэць,
 Хубта я' пойм'
 Харто' мадаванзё
 Таслариҗадо'.
 Янда саиркавам'
 Маня" Едэйкова"
 Петя нянда ня'
 Теневариҗади'.
 Сидя вэнекодо'

Хась нявотыхы'.
Пыдо' няхар"нэ
Мэта хан' ниня,
Ханакондо' ниня
Парондэрихи"на
Тэри судаворҕа".
Хан' ябцохо"на
Сюрняко хад,
Танзярако хад
Нянд' харвариҕа.
Сидя хэвхана
Носи" ваҕготаку"
Марэй" нуводо' -
Нумли" ливра".
Тэвасит сарпя"
Ты' сарпяраха".
Вы' яна" сыра'
Пад"та"вэраха".
Носи" ҕабта"мана
Сидя вэнекодо'
Тид" нэкалпиди'.
Пыди' нерцюнди'
Сыра ваҕгахад -
Ваҕгала"махад
Хорцыцяхава"
Ти вэрцаворта".
Нердандо' ня'
Харпо" ту" яля"
Ноксяндарев',
Хамбакадарев' -
Тохэцядарев'
Тире" ядахат,
Пулю" панахат
Лабнортараха".
Ноб" сяр' мэва'
Нултариҕадо',
Сидя сава яндо'
Хаця" пэдаяха',

Мяхарариҕаха'.
Яндо' саирмана
Тид" миё"мамдо'
Компасавана
Таслариҕадо',
Нули" явнанда
Нэдалёривы".
Теда' пакалтана
Ялэмдад' нэвам'
Тир" юталпидо',
Хал' тахамана
Мурюмбадараха.
Маниенахандо'
Тир" талкадаҕа"
Я' нэсомана.
Нумгэ" сэйриҕа",
Тире" тяхамлиҕа",
Лаҕгахалинэ
Хад ладҕада.
Хари вэнекодо'
Уголёк' ня'
Нобесумбаҕаха',
Хэбисумбаҕаха'.
Пыдо' няхар"нэ
Минзь яхавамдо'
Хамэдамбаҕадо'.
Хоркыцядарем',
Ваҕгалёдадарем'
Сыра' ваҕгахана
Нядам' нароҕоць
Пыдо' юседаҕа".
Коля сава няди'
Сыра' ваҕгахана
Сяха' сеҕгавы,
Сяха' хонёвы'?
Теда' манэ"ҕада
Ёря тондарев'
Ядембада сырам'.

Хад вэркада,
 Нема" хэривы",
 Тю"у' санаяд",
 Нэдаларияд".
 Наводы' пон'
 Пыдо' ни" мий" -
 Петя' мяд' нимня
 Нямдорэдаҥадо'.
 Нися вэсакода
 Пыдо' нерцюндо'
 Нултаривэда.
 Тарця нумлихина
 Нюта ядэрман'
 Тарем' ядэрман'
 Тэдосумбаван'
 Пыда харваҥась.
 Ванебтёда нюда,
 Маймбада нюда
 Харта манэ"лись
 Тэри ванебтэй".
 Ихинянда ма:
 - Пыдо' сензаҥэ
 Тэввадо' сава. -
 Пыда тарем' ма:
 - Нани' тарцяхава
 Сян' нёда" ҥа". -
 Тунда хэвхана,
 Няби пенда нимня,
 Ту' яля' ед'
 Коля компасм'
 Манэсалвэда.
 Тарця компасм'
 Харта табекодам'
 Ноб' таняхуна
 Сита нэда"мамда
 Тензибтеҥада.
 Тамальҥгана

Хад нумлихина
 Ёхоборпа"нанда,
 Ям' манэсартин'
 Сита хо"махад,
 Ту' явокон'
 Юда"махадандо',
 Нодь' индатамда
 Пыда нэкалҥась.
 Харта мя"лихинда
 Компасм' мэць
 Пыда ториҥась.
 Тарем' ханаҥада:
 - Тохолковахава
 Сава нэдараха,
 Хурка ехэравэ
 Тохолариҥада".
 Илевахананда"
 Ним' тараринҥу".
 Тарця сава серо
 Теневавахава
 Сава нив' ҥа".
 Нодь' сензаҥэ
 Харта" илеҥада",
 Мэ"мандара" яля
 Нерданда" ту"ҥа.

Я' ва"ал"

Хаерад' яля'
 Ё" хамзанакон'
 Пыда е"эмнянда
 Хурка я' ва"ал"
 Ханя' хандаҥа".
 Етя нэда ва"алм',
 Ила ҥарка ва"алм'

Тарем' ваде"надо":
- Я' њавнанда,
Ямидхана
Тэта ненэця",
Тадебито' ня'
Тю"уй сюрнава"
Маџгабада хиби"
Маниевоџгад
Такаливэдонзь,
Њаха" сюрмэдонзь.
Вы' яна" ниня
Њули" пэвџась.
Сыра хоё" ниня
Њэрм хадахава",
Њэрм мерцяхава"
Њобертархаць,
Сармикархаць.
Ма"лкодадарем',
Таныртадарев'
Сюдартархаць,
Тёрытархаць.
Пиндя пэвдяко
Ян' тадаџась.
Ид' халяхава"
Пуно мэџгарихи"
Лыџгарэйдаць.
Я' сармикэця"
Иба ё пюрць
Пили" ёндаџаць.
Њэрм яна" харп",
Ябиреня нумгэ"
Синё' тяхамаць.
Иры' яляхава'
Тарэнзяхавада
Яв' харэџоци"
Серма' то"олхась,
Пили" пыдаџась.
Тарць" ямбахана

Сэрдахавада
Ирина"на" мядо
Пили" толабись,
Сюртембидась.
Тэта ненэця"
Сава илеџаць,
Њули" таџгаџаць.
Хаерад' сэв'
Хуна сюрвамда
Нув' сармикэця"
Манэ"ливэдонзь,
Хамэдавэдонзь.
Таня' тиртяхандо'
Пыдо' ханимзеты".
Таси яна" ни',
Сыра' сяр' ни'
Мантырџаць,
Хубкадалиџаць.
Саць џока по'
Нув' сармикэця"
Харто' нито' пумна,
Ямб мюдадарем'
Я' маха' тяха'
Пили" хан"џаць.
Њаво" пиркана
Тире" панахат,
Тире" ядахат
Пулё тяхаримна
Њоб" џарка хибя
Тирць џадимясь.
Њарка вы' ява"
Сюртеџадась,
Нуво" пудхат
Па"мя саџохона
Ханза"лиџадась.
Тю"уй сюрнява" -
Нув' хаераком'
Тэта ненэцие"

Тадебито' ня'
Хуна сюрпавамдо'
Хамэдаңадась,
Манэ"лиңадась.
Пыда тарем' мась:
- Ёыно нэхэ"ңада",
Тю"у' нэкальяда".
Ёхоте"э муңго,
Тотнако муңго
Ен" ни' моёңада".
Хаерад' ялям',
Хаерад' сэвам'
Талевэ хибяха"
Тидхалеяда"!
Пыдо' няриндо'
Ѓухуна сярда
Вэзм' нёда" хае".
Хаерад' ялям'
Вы' янда" нимня
Пэсьлабтаңара"! -
Тарцям' намдари
Маңгабада хибя"
Ѓыно нэхэдырңа" -
Муңг" вывармондо',
Ен" хыно"мондо',
Хоё" сyumбахат,
Еси" малахат
Вэя" лохолиңа"
Лохортадрев'.
Ѓэд"мы муңг",
Тосавэй" муңг"
Ит' лямботана
Ябтабэкораха",
Ябту" икараха".
Пулю" поё"мана
Тиртя няхавадо'
Яля - хаерадм',
Тю"уй сюрняком'


Ѓяби пенда ни'
Тютилебтевэда,
Тодабцяндарев',
Хаңгананадарем'
Ѓарка яля' сэв
Тэри хаңанаңа.
Нув' ядавана
Ѓуда' самб' сер',
Яд"манда сер'
Ханилебтеңада.
Яля - хаерако
Тире" ялэмдаңа,
Нув' ядхана
Пэсьдахаяңа".
Ѓарка вы' ямда
Тодаламбари
Тэри хаңанаңа".
Лохортако яха"
Небя - нисяхато'
Маймбдараха".
Тад тикы' пуна
Ѓыно" енхава"
Ниць хыносумбю".
Вы' яна" тер"
Харто' помнандо'
Пыдо' илеңаць
Сава илаңгана.
Теда' тюку ва"алм',
Ила' хара' ва"алм'
Маня" яна" хибя"
Нара' ёльцяңгана,
Тензибтембидо'.
Ленин няна"
Ты' пэртыха"
Харта ңэдалё
Тэворо"махавам',
Ядэро"махавам'
Теда' лахана

Џоб' тенеҗадо'.
 Яна" җацекеы"
 Маня" яна" ва"алм',
 Лаханако' ва"алм',
 Тохоламбаҗадо'.
 Ленин нява"
 Москвахана,
 Мавзолейхана,
 Харта мята мюня
 Пыда синдарары.
 Яля' сэвхана,
 Яля' иняҗэ
 Нара' ёльцяҗгана
 Вы' яна" ни'
 Пыда сидяҗгада
 Харта тэворцеты.

Октябрёнок"

Маня" Едэйкова"
 Сава тоходанам'
 Ньюбе"манда нид,
 Сэр" имбытата
 Няби явыкана,
 Ленин няна"
 Җацекеыдава'
 Сеня' мальҗгы
 Нюдякоця сядм'
 Пыда минарҗада.
 Октябрёнок -
 Маня" Едэйкона"
 Саць сава нюмда,
 Ленин ири
 Нюдя җэб"нанда
 Тарця сава нювм'
 Пыда нись мэс".
 Пыда сехэрэнда

Пудм' нёдаванзъ
 Тарем' сертавэдо'.
 Октябрёнок"
 Ленин ири'
 Сита тотрев'
 Пыдо' тоходаҗгу".
 Маня" Едэйкова"
 Падаркавахана,
 Манзаравахана
 Сита пир яҗгу.
 Пыда җадыбята
 Тарця сава нювм'
 Харта нюбе"җада.
 Тикы җарка нювм' -
 Тикым' тэвода
 Инда ядавана
 Пыда тоходана.
 Маня" Едэйкова"
 Ила' саиркавам'
 Янда сехэрым'
 Хамэдамбаҗада.
 Тэри мэривада
 Пили" харта яҗгу.
 Манзарабцохона
 Ила саиркавам',
 Тохолкова серм'
 Пыда пир"җада.
 Маня" Едэйкова"
 Вы' тохолирта
 Инда ядавана
 Џоб' нёдаҗада,
 Тохолкоб"нанда
 Ида ядэрцеты:
 - Вэва тоходанам',
 Вэва манзаранам'
 Пыда нюбе"мада
 Харта сякананда
 Нив' вэва җэҗгу".



Ҳани" тотрев',
 Ҳацекэдрев'
 Тэри Ҳандара
 Харта ехэраҶа.
 Ҳамгэ вада' харам',
 Ҳамгэ Ҳани серм'
 Ехэраб"нанда
 Сидя сава няда -
 Коля няби Петя
 Сита нядабихи'.
 Сидя хора яндом'
 Пыдо' подерцеты",
 Ханакомдо' мэць
 Ҳэдалёрцеты".
 Ти Ҳадьбянда
 Маня" Едэйкова"
 Ленин' сядм'
 Няби явыкана
 Вынд ханаванзь
 Пыда пэрҶада.
 Манзараб"нанда
 Сита сахамлаҶу.
 Теда' тода нара'
 Пыдо' тохолко
 Ҳэвадарияд".
 Вынд танаҶуд".
 Ҳэрё' нярина
 Ҳани' тутриҶа".
 НеняҶахавада
 Теда' тюку та'
 Тянё Ҳэява.
 МараҶахабида
 Теда' миндя та'
 Ҳока" Ҳэя"ма.
 Яна" Ҳацекы"
 Ныхыхавадамдо'
 Ма"ламбаиць.
 Хаця" вадёиць.

ИлебядёҶая"
 Таня илеҶая".

Лахарёна" мал

Селебя' няҶы
 Нувода пябта,
 Маня" Едэйкова"
 Школаханда
 Пыда пяринҶуда.
 Тохолкова сер",
 Харта сата сер",
 СаҶговота сер".
 Маня Едэйкова"
 Харта тоходаҶу,
 Пыда мэбертаҶу.
 Тарць" ямбахана
 Вавлё иринда
 Вырэй Ҳэ"мамда
 Пыда тохолаҶу,
 Харта тэводаҶу,
 Недам нёдаринҶу,
 Харта выднаҶу,
 Пили" тэвадаҶу.
 НеняҶг Вавлё
 Ҳарка падаркана
 Тоходавы Ҳэб",
 Теневавы Ҳэб"
 Хурка сава серо
 СертаҶговакы?
 Синё нумлихина
 Нись тапаёрт",
 Нись ёхоборт".
 Маня" Едэйкова"
 Ҳули" пыдаҶада.
 Ҳаре" тюку яля'

Пыда тамна нюдя.
Тюку илаңгана
Пыда сейконда
Мэта яляха"на
Харвахавабата
Хурка хибяңэ
Хантанакы?
Мэ"мандида яля"
Нерданда миңа".
Тире" ядавана
Тиртя һаном' мэць
Тиртаңгодакы?
Ям' манэсарць,
Вым' вэде"пась
Ядэртанакы?
Вади ядэлана
Хар"на" яна" нимня,
Нув' мерцяхава
Мань хани син'
Хасабалиңась,
Пыда тарем' мась:

- Маня" Едэйкова"
Пэвсюмбэхэна,
Школахана
Нята нярихита
Сюдбабц мэ"ңа,
Сё' харасавэ'
Тамняриндо' ңа".
Писавэй яля'
Вэро"тялаяда,
Ѓобт' вэтарпида.
Тад тяхахава'
Хибя тенева -
Вы' янда ты"
Лекарариңэ
Тараңгодакы?
Ѓули" явнанда
Тюкум' падыба
Ѓэрм' яна" мерця
Си"ми нядабись.
Яни" ңацекы"
Пыдо' нядаңгуць.

КНИГАНДЕР

ВЫ ЯХАНАНДА (Нюртей пеляда) 5	Тэхэна сянаку" 22
Нерденя" вада" Нэрёй 7	НАРА Нара' нерденя яля" 25
НЭРЭЙ Нэрёй нумгана 9	Варё" надимы" 26
Ханебцё' пумна То' сэркана 12	Су"ляко 26
Мутра 14	Пирдыржа" 27
СЫРЭЙ Поңэй мерця' хад 17	Яркола 28
Тодабць' 18	Нарэй пи" 29
Пэвдей' пи 20	Юдта"ма' пя 29
Сэдорана' хэвхана 21	Лохортако" 31
Мирць тенева 22	Нэвка 32
	ТА' Мякандо' танэйд" 35

Епдя" тэвыд"	Сиддо' тохоламба
37	50
Халям' хадабада"	Нита ня'
38	53
Сарпя"	Сармикато' лохоко
38	57
Школан' хэванда нерня	Мядонда
40	58
Ниди' пюрҗаха'	Буровоян'
41	60
Пудана вада	Мань ненэсядм'
43	61
ЕДЭЙКОНА" НЯ"	Едэй по' яля" тэвыд"
(Нябимдей пеляда)	64
45	Я' поҗгана сеҗга"
Вада' саирмана	68
47	Я' ва"ал"
Нерденя" сер"	70
48	Октябрёнок"
Хонёлавахана	73
49	Лахарёна" мал
	75

Леонид Васильевич Лапцуй

ЕДЭЙКО

Редактор *М. А. Федотовских*

Художник *А. В. Вохмин*

Художественный редактор *О. И. Журавлева*

Технический редактор *Н. Н. Заузолкова*

Набор *Л. М. Мусатова*

Корректоры *Е. В. Иванова, И. П. Кирсанова*

Подписано в печать 13.11.2006.

Формат бумаги 72х92/16. Бумага ВХИ.

Гарнитура БалтикаС. Печать офсетная.

Усл. печ. л. 6,13. Тираж 400 экз. Заказ № 1209.

ОАО «Тюменский дом печати»

625002, г. Тюмень, ул. Осипенко, 81, тел. (3452) 75-15-81